


正誼堂文集 附續集

三





正 誼 堂 文 集

附 續 集

(三)

張 伯 行 撰

正誼堂續集卷之一

疏

題請鄉試廣額疏康熙四十七年

爲聖朝文治日隆等事。該臣看得文治覃敷。士風丕振。正當極盛之會。請弘曠典之仁。欽惟我皇上道隆洙泗。治邁唐虞。樂育人材。溥天悉霑化雨。廣興文教。比戶不輟誦歌。誠千古以來未有如今日之盛者也。閩省士子。嚮被聖化。讀書之人。日益加多。且乙酉鄉試。取中文舉人。欽奉恩詔。廣額十名。無不感勵激發。爭自濯磨。以自奮於功名之路。據閩閩府州縣學生員蔡衍鐸等呈籲。題請永垂定例等情。經臣批行查議去後。茲據布政使金培生詳稱。查福建省額中舉人七十一名。又奉部行額外取中五經三名。於康熙四十二年。欽奉恩詔。內開。天下讀書之人甚多。直省應酌量廣額。隨奉部行。福建省照大省例。加增十名。於乙酉科鄉試。共取中八十四名。今歲戊子科鄉試。人才愈衆。讀書愈多。閩省士子。幸際景運昌期。冀廣書升論秀。請俯順下情。恩賜入告。於本年戊子科鄉試起。請照乙酉科加增名數取中。永爲定例。等由。臣仰體皇上樂育人材。廣興文教至意。不敢壅於上聞。僥蒙俞允。不特多士慶風雲際會。而且振古仰文治光昭矣。伏乞敕部議覆施行。

請續賑淮揚徐三屬災民疏康熙四十九年

爲災黎已蒙蠲賑、目下謀食猶艱、仰懇皇仁再賜賑恤事。竊照淮揚徐三屬濱臨黃運兩河、向來時遭水患、土瘠民貧、幸荷聖明疊賜蠲賑、加意滋培、萬姓得安故土。康熙四十八年海高等十九州縣并淮大徐三衛夏被水災、軍民乏食、經前撫臣于準會疏題請動支康熙四十七年各屬解貯司庫留漕平糶價銀一十萬兩、分給賑濟、部覆奉旨允行、令將四十九年文職官俸、役食、捐補還項、業於去歲秋杪冬初、檄飭藩司照數動支、分發被災各屬、按名散放。小民已慶更生、無不感頌皇恩。今臣奉命調撫茲邦、莅任以來、仰體皇上愛民之心、博訪民間疾苦、察知淮揚徐三屬之海州、邳州、清河、桃源、宿遷、睢寧、沐陽、高郵、興化、徐州、沛縣、蕭縣、碭山等十三州縣并徐州一衛、秋禾復被災傷、困苦尤甚、而所領賑銀亦止大口三錢、小口一錢五分、與僅被夏災者相等、是以延至新歲、仍多乏食。當此春氣尙寒、麥秋未屆、糶糴黎庶、飢餒堪憐。若不亟請聖恩再賜賑恤、誠恐仍致流移。惟是江屬從前積貯米穀、久已動賑無存、而向蒙發帑賑過之窮氓、又未敢再請動支正項。查有江蘇等屬、康熙四十八年蠲缺存留俸工等銀一十五萬五千五百餘兩、已經前撫臣于準題請循例撥補、內除祭祀、科場、廩糧、恤孤、及鋪兵等項苦役工食、係萬不可缺之款、仍應按數支給外、其官俸、役食、雖係養廉餬口、照編應支之款、然官役不領、尙可支持、而窮黎枵腹、實堪憐憫。且四十九年俸工已奉捐補賑項、則四十八年亦可照例動賑、但未准部臣撥有定款、除見飭藩司統計被災州縣衛、乏食軍民、賑至麥熟、應需銀兩數目、同分委散賑事宜、悉心妥議造冊詳報外、所當

仰請皇上敕部。將請補江屬康熙四十八年獨缺俸工等銀。迅賜撥給。准予酌量動撥賑濟。賑畢之日。照例造冊報銷。如請補之銀。部覆動撥本省鹽課關稅等項。臣得移催速解。早爲給賑。儻係撥協鄰省錢糧。災民勢難緩待。并懇允臣先動司庫見銀散給。俟催協款歸補。庶億萬饑民。咸得早霑聖澤。共慶生成矣。臣謹具題。

題報擡財神疏康熙五十年

爲題明事。該臣看得今歲江南文闈鄉試發榜之後。風聞各屬士民紛紛議論。稱考試不公。臣以求得實據。不敢草率入告。正在密加察訪。茲準督臣移送疏稟。江南正主考左副都御史臣左必蕃。開輿論喧傳。有同考房官句容縣知縣王曰俞所薦之吳泌。山陽縣知縣方名所薦之程光奎。皆不通文理之人。或係傳遞代作文字。與房官打通關節。亦未可定。今場後傳聞如此。則外簾疏忽。內簾作弊可知。見有繕疏題參。移明督臣看守。已經督臣具題。將王曰俞方名委員各摘取印信。候旨定奪。又據蘇州府知府孟光宗詳稱。康熙五十年九月二十四日。有數百餘人。擡擁財神直入學門口。稱科場不公。務求申詳等情。竊思率士士子。久荷我皇上教養深仁。而廣額取中。尤蒙曠典。乃今江南發榜後。衆議紛騰。業經正主考臣左必蕃覺察題參。又據府詳財神擡入學門。臣身在地方。不敢隱匿。相應具疏題明。伏乞皇上睿鑒施行。

海洋商漁船隻編號疏康熙五十三年

爲備陳弭盜之策以靖海氛事。康熙五十三年正月初五日。準兵部咨開。職方清吏司案呈。奉本部送兵

科鈔出。該本部等部議覆。陞任御史陳汝咸題前事等因。康熙五十二年十一月二十一日題。本月二十五日奉旨。依議。欽此。欽遵。鈔部送司。爲此合咨前去。欽遵施行。計黏單一紙等因。到臣。準此。除經移行遵照外。該臣等看得。陞任御史陳汝咸條奏稽查海賊劫奪商船一案。先經總督臣赫壽會同臣議。以商漁船隻久經編號印烙給照。汛守官兵不過查察真僞。而一出大洋。或行不軌。亦未可定。應如臺臣條奏。海澳照依內地保甲之法。無論大小船隻。俱各設立澳總甲長。連環互結。分給腰牌。出入海口。以便查驗。如一船爲匪。則治澳總甲長及同甲之罪。茲準部覆四十六年。原任福浙總督梁鼎疏稱。商漁船隻出外洋者。令十船編爲一甲。取具連環保結。一船爲匪。餘船並坐等因。具題。奉旨依議。通行在案。但日久恐致疏忽。應如陞任御史陳汝咸所請。再行申飭沿海各省督撫。實力奉行等因。臣思內地之稽查既嚴。外洋之盜踪自熄。無如邇年以來。海盜劫掠屢屢見報。海洋盜氛究不能靖。蓋商船與盜船在洋行駛。遠近茫無識認。而巡哨官兵止循稽查之令。驗過即便放行。殊不知洋盜每有先劫商船。卽爲行劫之具。復攬牌照爲盤驗憑據。以致盜氛未靖。商害無窮。臣查各鎮營戰船業經督臣赫壽條議。兵民船隻各有分別。當令營船刊刻號數。奉旨依議。欽遵在案。臣以爲不獨營船宜與民船有別。而出海商船漁船亦應有辨。又準閩浙督臣范時崇咨。準福建水師提臣施世驤咨會。請於商漁船篷上大書某縣船戶某人字樣。臣以爲不獨商漁船宜書。卽出哨營船篷上亦宜書寫。臣請將商船前後刻大商字。兩傍刻某省某府某州縣第幾號商船。船戶某人。俱用粉地墨書。漁船前後刻大漁字。兩旁刻某省某府某州縣第幾號漁船。船戶某

人亦用粉地墨書其篷上令將商漁字樣一例書記至凡出哨營船前後亦刻大營字兩旁刻某省某標某營第幾號捕盜某人所有刊刻字樣俱用紅硃填寫而篷上紅書大營字并請將商漁各船船戶舵工水手客商人等各給腰牌一面刊明姓名年歲籍貫住址一面繪畫像貌其標營船隻捕舵在船人等並照此例給以腰牌查驗如是則號數既定色認攸分出洋官兵一瞭即明再驗之在船人等聲音面貌并所執照票則奸良易於辨別儻有匪船混迹不難詰訊擒拿其於出入海口汛防兵役亦便稽查如船無字號人有可疑即行盤拏究問嚴加治罪庶幾匪類潛蹤良民安枕此分別標記誠有便於巡哨利於商民似亦海洋弭盜之一法也至漁船止許捕魚不許裝米酒下海亦不許將海洋各樣貨物裝載進口如有不遵標記及漁船裝貨者嚴加治罪臣從靖盜安民起見謬抒一得之愚冒瀆宸聰可否採擇合候部議覆奪臣謹具題伏乞皇上睿鑒敕部議覆施行

請免揚州落地稅疏康熙五十三年

題爲揚城無土產之物客貨有重徵之苦公籲飭議柔遠甦商事據江蘇布政司李世仁會同兩淮鹽運司李陳常詳稱揚州府稅課司每年額徵商稅銀一千二百一十八兩四錢內有解司銀一千一百七十三兩四錢應解江安糧道麥折銀四十五兩原出之各商鋪戶日逐於落地貨物按照部則徵收年終開列稅官職名造冊奏銷今商民王永昇等呈請豁免業經兩淮運道議將經費銀兩抵完商課按照原款額解何衙門若干每年於鹽差報滿之時經由本道衙門扣捐移解其造報奏銷自應開列本道衙門職

銜。註明捐補字樣等因。本司道覆查得揚稅司每年額徵商稅錢糧。既經運道捐補。照額完解。以副歲額。原無歧誤。然奏銷考成。亦開列該運道職銜。自有專責。則稅課一官。別無職掌。似屬虛設。應請一併題明裁汰。以垂永久。相應詳請院臺俯賜會題定案等情。到臣。據此。該臣看得揚州府稅課司額徵商稅銀兩。例應分解藩司。糧道。兩衙門撥用。每年造入雜稅奏銷冊內。報部之項。先據揚州府商民王永昇等具呈。以揚州客貨。既已到關投鈔入城。又有稅課司徵收。似屬重科。籲請豁免。經臣批行兩淮鹽運司查議。續據議覆。稅課乃報部錢糧。難以縣缺。而目擊民艱。又難膜視。請於兩淮運庫經費銀內代爲捐解。免徵於民。臣因事關豁免稅課。又隨批檄江蘇布政司覆查會議。去後。今據布政司李世仁會同陞任兩淮運司李陳常詳稱。揚稅司每年額徵商稅銀一千二百一十八兩四錢。原出之各商鋪戶。日逐於落地貨物。照則徵收。年終開列稅官職名造冊奏銷。今王永昇等呈請豁免。議於兩淮經費銀內節省捐抵商課。按照原款分解。以副歲額。奏銷考成。即開運司職銜。稅課一官。別無職掌。詳請題明裁汰。前來。臣查稅司之設。原以責成徵收稅課。今揚州府稅課司額徵落地商稅銀兩。既經兩淮運使情願於每年經費銀內照額代爲捐解。則上無損於國課。下有益於商民。所當仰懇聖明。俯將揚城落地貨物稅準其捐解免徵。至該稅司既不徵稅。別無責任。并請裁汰。以免虛設者也。臣謹會題。伏乞皇上睿鑒。敕部議覆施行。

明白回奏疏 康熙五十四年

爲遵旨明白具奏事。竊念臣以章句迂儒。硜硜自矢。荷蒙我皇上聖德優容。矜恤備至。兩經審事。大人題

參我皇上不卽嚴加斥革。復令臣明白具奏。跪讀恩旨。涕泗交橫。感激無地。臣非木石。正不知何以仰報高厚於萬一也。蓋臣智短才庸。叢過多端。有負簡畀重任。一切戀主之私。前疏冒昧備陳。不敢贅瀆天聽。但思本案張元隆雖據報身故。而金多黨衆。造船出海。人人可以冒名。處處皆能領照。久經審供二次。遲延本內。俱已題明在案。臣爲綏靖海洋起見。急欲杜漸防微。實非敢故爲譴張妄瀆也。至張令濤一犯。原因上海縣民顧協一等首告黨惡夤緣。被害告發者。十有餘紙。前藩司牟欽元庇匿不出。以致縣案莫結。不得已而具疏請旨。將牟欽元暫行革職。著追張令濤務獲。使當日張令濤無人告發。並不改易姓名。藏匿牟欽元署內。則臣之參爲不實。今控張令濤者。有顧協一、閔三等衆。令濤之在藩幕。又有伊子張二所供鑿鑿。而欽元亦自認不諱。則臣之參實屬不虛。令濤縱非通洋。亦係豪惡。何得藉庇抗官。卽謂通洋無據。亦應於顧協一坐誣。臣雖愚昧寡援。而身爲地方大吏。焉能置之不究乎。及查會審日期。去年八月初六日。楊宗義已入文闈監試。王英謀於初十日提到顧協一取供。而捏稱與楊宗義會審會詳。獨不思科場大典。安徽臬司無出場審事之例。江蘇署臬司亦無進場審事之理。乃王英謀公然捏稱會審。夫會審可以假捏。何事不可假捏。口供勘語。俱不可問。王英謀之徇庇同寅。欺朦上官。不辯自明矣。其李崇御一案。臣據崇明縣詳。曾令前藩司牟欽元遣親信家人確驗。旋據回稱。金銀已不在。口所遣者若非令濤。何以張思永爲之營謀。而金銀盡運於張元隆之後門乎。臣前蒙察審時。將張元隆、張令濤惡蹟。并署臬司朦詳情形。俱經咨明欽差大人在案。據咨上聞。自能仰邀聖鑒。案件自見明白。而審事大人將各犯悉爲

開脫。獨參臣以妄誕自矜之罪。但臣雖歷官巡撫。無飲冰茹蘗。服食起居。未嘗脫寒酸故態。人或哂爲迂腐者有之。何敢於君父之前。而反蹈矜妄。自滋罪戾乎。總緣臣性直成性。卽有風聞。亦思入告。凡事執法。不肯纖毫假借。致來衆忌。鑲謀捏陷。而大人亦遂指臣爲偏私暴戾耳。臣止知有君父。不知有身家。止知報聖恩。不知避嫌怨。惟恐案情未能得實。則臣之負罪益深。此臣區區微忱。欲泣陳於君父之前。而不敢一事之挾私。一念之或欺者也。合將原委。遵旨先行明白具奏。伏乞皇上睿鑒施行。

摺

請緩徵摺 康熙四十九年

奏爲災漕力難全完。仰祈睿鑒事。竊照江蘇松常鎮五府屬四十七年分被災田地。秋禾淹沒。無米完漕。前撫臣于準因災民力難供輸。請緩徵一半。於四十八年帶徵。臣莅任之始。已屆兌運開幫之時。據各屬紛紛詳籲。咸稱疊災之後。小民拮据不遑。完新不能完舊。除新糧兌足外。其帶徵災漕。完倉者僅十之四五。臣查漕糧關係國儲。緩半帶徵。已屬曠典。豈容再有拖欠。第念江蘇等屬。上年雖獲有收。而四十六七兩年。連遭災祲。民生困苦。久在睿鑒之中。今欲以一年而完年半之漕。民力實有所甚難。臣敢再懇皇上格外施恩。將帶徵災漕。除已徵在倉者。仍令儘數派兌。其力不能完者。緩至今冬帶徵運通。不過稍緩須臾。而頂戴洪慈。實非淺鮮。除請賑饑民見在另疏具題。其各屬災漕。容臣查明實完實欠。統於開幫疏內

題報。再臣已疏請陞見。如蒙俞允。卽星馳赴京。恭聆聖訓。其賑饑事宜。應委署江蘇布政司事蘇州府知府陳鵬年董理。自能宣布皇仁。澤被窮黎。且見據各屬士民呈稱。該員清廉愛民。實心實政。自奉特恩。署理藩司印務。黃童白叟。咸頌聖天子知人之明。赴臣衙門。連袂呼籲。懇題實受。臣隨曉諭士民。我皇上睿斷如神。明燭萬里。自有聖裁。何敢冒昧瀆奏。但民情願望。不敢壅於上聞。合並具摺奏明。爲此具摺遣臣家人代臣恭進。伏乞睿鑒施行。

告病摺康熙四十九年

爲江蘇事務實繁。微臣衰病難理。懇祈恩準回籍調治。免致貽誤地方事。臣一介庸愚。草茅賤士。荷蒙皇上不次超擢。歷任巡撫。皆未由保舉。出自聖明特簡。知遇之隆。從古未有。屢蒙賜匾。賜對。賜詩。賜扇。及眼鏡。哈密瓜。鹿條。風魚。人參。錫寶。頻加。而且溫旨疊諭。寵眷之盛。更復千載一時。是深諒臣之樸誠無僞。異數加恩者。惟我皇上。而臣之所恃以報皇上者。亦惟此一點真心實意。竭蹶辦事。不敢稍有欺瞞。不敢偷安苟且。有負我皇上簡畀之至意。區區自矢。有生之日。皆報効之日也。但念皇上委臣重任。凡地方一切事務。自應料理妥當。不致上煩聖心。方爲無愧厥職。奈江蘇地方繁劇。臣才迂拙難堪。前經具摺陳奏。內云。江蘇庶務繁多。數倍閩省。臣雖盡心竭力。期於措置合宜。而才識短淺。謀慮難周。恆虞隕越。隨卽荷蒙天語誨誘。諄諄。今又數月。一切事務日積日多。其勢愈覺艱難。因是憂懼漸成。怔忡之疾。心跳頭暈。不時舉發。且臣年已六十。精力漸衰。事多遺忘。見雖勉強辦理。而事務維艱。才力難任。誠恐將來貽誤地方。則

臣罪愈覺莫追。況今年補行大計。尤關黜陟之重。恐耳目未能周悉。舉劾何以允協。更深隕越之虞。伏祈皇上俯念江蘇重地。憐臣衰病之軀。萬難勝任。恩賜回籍調治。庶不致貽誤地方。俟病痊之日。或得再竭駑駘。以仰報聖恩於萬一耳。爲此具摺奏聞。伏乞睿鑒施行。

請羅欽順從祀孔廟摺雍正二年

爲恭請崇祀正儒以光盛典事。欽惟我皇上續膺實歷。卽褒崇孔子。五代加封王爵。隆儒重道。亙古未有。臣查明儒江西有羅欽順者。德備諸躬。道可淑世。凡天人性命之理。仁義道德之旨。靡不研究其蘊。其生平學術。皆本躬行心得。體驗親切。實爲後之學者所共遵守。至辭免吏部尙書。閉戶潛修。其恬靜之風。又爲當時所共推服。臣謹按欽順之學。實得程朱正脈。且有發明之功。其立身高潔。年踰八十。始終一節。如從祀學宮。洵可仰副皇上隆儒重道之至意。儻臣言可採。乞敕下內閣九卿詳議施行。謹奏。

條陳摺雍正二年

爲遵旨條陳事。竊惟經明行修。乃稱儒者。文章爾雅。斯號通才。是以聖賢之道具在六經。而濂洛關閩。宋儒性理諸書。則皆羽翼經傳。闡明道學者也。聖賢之道。發爲文章。而博學宏詞。古文詩賦之作。亦皆黼黻太平。輝煌治理者也。皇上天縱生知。道全德備。諸臣幸被光華。無不踴躍奮勵。求爲有用之學。微臣敢請欽定條規。嗣後新選翰林入館之初。卽分經學文學二途。願爲經學者。卽以經書性理教其誦習。而凡館課及散館。皆以經書性理命題。願爲文學者。卽以古文詩賦教其誦習。而凡館課及散館。皆以古文詩賦

爲試。則諸臣得專心誦習。而通經學道之彥。濟濟奮興。博學能文之英。翩翩蔚起矣。伏乞皇上睿鑒施行。謹奏。

表

恭進濂洛關閩書表 康熙五十二年

奏爲恭進濂洛關閩書。仰祈睿鑒裁定。以重儒宗。以光文教事。臣竊惟二帝三王之道。得孔曾思孟以大其傳。五經四子之書。至周程張朱而闡其奧。微言大義。炳如日月之常昭。繼往開來。垂諸宇宙而不朽。蓋自漢唐以下。代有羣言。而考其說。惟在乎詞章訓詁之間。卽如董韓之徒。亦多正論。而究其歸。尙昧夫誠敬知行之本。自濂溪著太極圖說。默契道源。迨橫渠作西銘正蒙。研精理窟。二程承周子指授。發明尤暢。精義散見於遺書。朱子集諸儒大成。纂述倍詳。至理旁羅於語類。要皆本乎身心體驗之實。而非徒口耳誦說之資。此濂洛關閩。其淵源直上。接洙泗者也。但全書浩博。盡讀則記識弗強。且義蘊精微。淺嘗而旨趣未晰。不由纂輯詮解。固慮後學以繁奧而難求。若非欽定頒行。又恐前言因日久而廢墜。欽惟我皇上聰明天縱。敦敏性成。德盛化神。四海頌太平天子。仁育義正。萬方歌有道聖人。五經四子之書。旣兼綜而條貫。周程張朱之學。復加意以表章。御賜匾聯。輝映先儒宅里。尊崇性理。式端選士章程。定紫陽之全書。斯文攸賴。升考亭於十哲。特典昭垂。皆由皇上道德淵涵。事事本躬行心得。故令當世風聲丕振。人人知

正學儒宗。溯自皇古以來。道統相承。在君相而迄素王以降。心傳代嬗於師儒。何幸天運循環。復覩聖皇建極。由洛閩而溯鄒魯。遠接千餘年未續之傳。自宋代以至今茲。正際五百歲昌期之會。我皇上應運而興。乘乾以御。本心法爲治法。統古今天地之道而咸宜。以作君兼作師。合帝王聖賢之傳而爲一。猗歟其盛。煥乎有光。臣至愚極陋。何能仰佐高深。被澤蒙休。每欲宣揚盛美。竊見鄉會兩闈試論。專取性理一書命題。然士子臨場。不過隨題敷衍。原未識立言之根本。卽主司閱卷。止取文理明通。何暇辨義類以指歸。雖曰先儒之精蘊難窮。亦由學者之鹵莽從事。臣濫膺科目。謬任封疆。奉職乏才。祇恪遵乎聖訓。服官稍暇。仍尋玩乎儒書。因擇其簡明親切之言。可資後生肄習。則闕其幽深精奧之旨。以俟積久融通。彙次成編。詳加集解。賢關聖域。寧云已得其階梯。句櫛字梳。惟冀不述於塗轍。以之應試。或可藉爲先資。用此檢身。亦庶幾於寡過。但臣學識短淺。搜採有所未精。兼臣吏事繁多。纂修又非其任。雖常偕生徒以分訂。終恐失前哲之初心。方慮無當於簡編。詎敢瀆陳於黼座。不謂鄙儒末學。荷蒙聖澤薰陶。千載一時。自慶難逢之嘉會。葵傾芹獻。仰酬莫報之弘恩。固知燭火微光。難分日月之照。尤望鵬浴勺水。同歸河海之宗。爲此謹將臣集解濂洛關閩書恭呈睿覽。伏冀聖裁。並請欽賜嘉名。御製大序。將見龍章煥采。遐邇共沐鈞陶。睿藻揚輝。今古咸霑德化。自此家傳戶誦。均仰聖明之教澤無窮。抑且俗易風移。共慶先儒之學。有敎矣。臣無任瞻天仰聖。激切屏營之至。謹奉表恭進以聞。

擬疏

擬請廢天主教堂疏

爲請廢天主教堂。以正人心。以維風俗事。竊惟我皇上天縱聖神。崇儒重道。數十年來。海內嚮風。唐虞三代之隆。不過是也。切見西洋之人。歷法固屬精妙。朝廷資以治歷。設館京師。待以優禮。於理允宜。不謂各省建立天主教堂甚盛。邊海地方如浙江、廣東、福建尤多。臣莅任以來。細查確訪。見其徒衆日廣。意誠有未安者。敢竭其愚。爲皇上陳之。凡人之生。由乎父母。本乎祖宗。而其原皆出於天。未聞舍父母祖宗而別求所爲天者。亦未聞天之外別有所謂主者。今一入其教。則一切父母祖宗。概置不祀。且駕其說於天之上。曰天主。是悖天而滅倫也。堯舜禹湯文武列聖相承。至孔子而其道大著。自京師以至於郡縣。立廟奉祀。數千年來。備極尊榮之典。今一入其教。則滅視孔子而不拜。是悖天而慢聖也。且皇上以孝治天下。而天主教不祀父母祖宗。皇上行釋奠之禮。而天主教不敬先聖先師。恃其金錢之多。煽惑招誘。每入其教者。紳士平民。分銀若干。各以次降。臣愚以爲漸不可長。且入教之人。男女無別。混然雜處。有傷風化。閩省地方如福州、泉州、興化、漳州、福寧州等沿海各郡縣。布置尤多。每教堂俱係西洋人分主。焚香開講。收徒聚衆。日增月益。不可禁止。誠恐其意有不可測。臣以菲才。謬膺皇上特達之知。授以巖疆重任。夙夜祗愼。惟恐無以上報主知。此事尤臣在閩所目覩而不得不言者。故敢竭盡愚誠。伏望皇上特降明詔。凡各省

西洋人氏俱令回歸本籍其餘教徒盡行逐散將天主堂改作義學爲諸生肄業之所以厚風俗以防意外儻其不時朝貢往來則令沿途地方官設館供億足矣臣不勝惶悚隕越之至

擬請鄉舉里選疏

爲請舉賢良方正之選以收用人之實效事竊惟自古之人才各殊其途自古用人之法各異其選古者鄉舉里選所取端在實行今惟科舉以取士所重獨在文詞故古之士皆敦行今之士專工文也皇上御製訓飭士子文以德行為先而文詞次之是亦古者鄉舉里選教人修行之意也數十年來人皆知行誼爲重蒸蒸向風翕然不變矣獨是制科之法未定而人心之趨向猶未盡一也臣查康熙□□年皇上舉博學宏詞之選而淹雅貫通之儒亦應運而興今若舉賢良方正之選而經明行修之士有不鼓舞而思奮者乎今制逢子午卯酉之年行鄉試辰戌丑未行會試臣愚欲於寅申巳亥之年加鄉舉里選之科舉賢良方正之士以裨世教而正人心其道必本於人倫以忠孝爲主而序別信次之五倫兼盡者爲上選忠孝兼盡而序別信有其一者爲次選至於五倫僅有其一者又次之無論舉人進士貢監生員以及布衣皆得入選其法以恪遵聖訓謹身寡過早完國課急公尙義者爲忠以生事死葬始終盡禮昭彰耳目宗族共稱者爲孝至於長幼之序夫婦之別朋友之信皆隨其所行之事實而填註之或謂科舉糊名尙有關節鄉舉里選保無弊竇臣以爲由士民而舉之儒學儒學核實舉之知縣知縣核實舉之知府知府核實舉之本道本道核實舉之兩司兩司核實舉之督撫督撫核實合詞舉薦於禮部禮部合九卿科道

核實進於內閣。內閣核實。獻之皇上。或賜之召對。以驗其立身之實行。或加考試。以觀其經濟之實學。果係才德兼全者。送與吏部。或照其見在之品。量爲優用。或照其應得之職。豫爲先用。或皇上遇緊要之缺。特行擢用。至於生員布衣之無品級者。亦可附之貢監之末。量爲酌用。如此慎重。似亦可以無弊矣。若猶慮其有弊。則有連坐舉主之法。在旣舉之後。若有貪賊壞法。按驗得實者。照其事體之大小。以爲處分之輕重。將所舉之督撫司道府縣儒學一體連坐。至若性情之偏執。或事理之失當。則祇罪本官。而不及其舉主。如是。則各官俱以功名爲重。又何至有妄舉之失乎。或謂子午卯酉之舉人。辰戌丑未之進士。尙有十年而不得選者。再加以寅申巳亥鄉舉里選之科。選法不更壅滯乎。臣以爲不然。所舉之人。皆應選之人也。特於應選之中。或爲先用。或加優用耳。初非於應選之外。別有所加也。選法又何虞其壅滯乎。且選舉之法。一行而所以鼓舞天下之人才者。在是矣。忠者舉而人皆勉爲忠。孝者舉而人皆勉爲孝。序別信者舉而人皆勉爲序別。信是又舉善而教不能之一法也。此微臣一得之愚。謹奏。

擬請防閩海疏

爲請陳防海要策。以奠邊疆事。臣觀天下形勢。自西北而東南。至閩中而盡矣。又觀閩中形勢。自上游而下游。至漳泉而盡矣。茫茫大海。近通浙江。廣東。遠接呂宋。琉球。日本。番舶之所往來。商漁之所出入。皆在於此。臣愚謂。幅員旣廣。則荒陬遠嶼。或便匪類之逃藏。船舶旣多。則此去彼來。易滋奸徒之出入。是故巡察不可不周也。臣思匪類所居。必在糧餉可通之處。奸船所聚。必擇風波可避之區。今但令水師鎮營於

要害水口多設哨艦。逐日巡視各島灣。以絕其飲食。斷其窩藏。而奸宄之自外至者息矣。盤詰不可不嚴也。臣思海洋無賴之徒。未必生長海上。不過內地人民。或爲饑寒所迫。或因避罪逃去耳。其生平行徑。豈能欺瞞鄉里。今但令州縣有司。於各處地方。編定十家爲甲。十甲爲保。十保爲鄉。各立一長。專察本鄉本保本甲之人。遇有不事生理。專習拳棒。夫與酗酒縱博。素行無良者。該長爲之責其改業。嚴其約束。其有不從者。鳴官治之。閒有自外鄉來者。爲之考其來歷。詢其去向。苟有蹤迹可疑之處。即便斥逐。不得姑容。其奸形已露者。立解州縣審鞫。凡鄉長任事五年。勞績最著者。許其考授把總。餘或給與吏員頂帶。則彼樂於趨事。而奸宄之自內出者絕矣。然臣更有請者。臣考前朝防海之制。自山東以至廣東。沿邊皆置水寨。其在閩者。有烽火門、小埕門、南日、浯嶼、銅山五處。其水寨所轄。復有會哨。或一寨而當會者二三。或一寨而當會者四五。哨道聯絡。勢如常山。會捕合并。陳若魚麗。防禦之策。未有善於此者。臣謂當今鎮營星列。亦足當水寨之制。勿事更張矣。欲使一呼百應。則會哨之法不妨倣而行之。於以乘風破浪無難也。再稽前制。凡十里之中。各立墩臺。以司烽堠。風帆瞬息。專賴傳燎。警報之捷。無有甚於此者。臣愚謂故臺雖廢。基址尙存。欲使有備無患。不妨並舉而修之。緩急有用也。夫以汪洋浩淼之區。又爲四達交通之所。防守稍疏。鯨波易起。與其圖之倉卒。孰若豫於平時。此臣所以有未雨綢繆之慮也。恭逢皇上文武聖神。威靈遐邇。總督提鎮諸大臣效力宣猷。民康物阜。大海之上。自可無虞。而久安長治之道。或宜早計及此。敢抒管見。冒瀆聖聰。伏乞睿斷施行。

右擬疏三篇。先生撫閩時所作。將次第上之朝廷。後因移撫江蘇。政務日繁。竟未暇具奏。茲附刻於疏奏之後。以見先生學業之湛深。經濟之弘遠云爾。

正誼堂續集卷之二

公移

移浙撫飭查海口閘座咨文

爲移請飭查海口閘座事。爲照浙省之嘉湖與江省之蘇松接壤。凡沿江沿海。設立閘座。以資蓄洩。莫不均霑其利。本都院於上年農隙時。通飭所屬。堅築圩岸。挑浚河流。并飭將原設閘座。督令閘夫。潮漲起版放水。潮退下版蓄水。今歲插蒔之際。天氣常晴。而內河之水。不致乾涸。得以車戽栽插。見皆麥秋有望。皆以前設立閘座之力。惟是河口甚多。而有閘之處無幾。必得俱設閘座。方可水旱無慮。其如所費不貲。遲遲未果。前准浙閩督部院范。移請飭屬閉閘蓄水。以資灌溉等因。已檄江蘇藩司。轉飭各屬遵照查明。俟詳到另奪。并先移覆外。查太湖爲嘉湖蘇松等府匯水之巨區。尙書云。三江旣入。震澤底定。所謂三江者。一在太湖東北。名曰婁江。卽今之劉河是也。一在太湖正東。名曰吳淞江。卽今之吳淞口是也。一在太湖東南。名曰東江。湮沒不可復考。去冬將賑閩米石運至乍浦交卸。曾經委員察訪舊迹。兼查平湖縣誌。乃知乍浦爲古之海口。大約卽係古之東江。或因閘壞不能蓄洩。久閉不開。往年浙江水大不能卽瀉。每先淹嘉湖。次及蘇松。而後由江下海。且查劉河吳淞有閘之處。海口皆建有天妃宮。而乍浦閘座之旁。

亦建有天妃宮。其他海口雖多，並無天妃祠宇。此其係古東江之明驗。再如海寧地方，另設有黃灣閘，皆關江浙水利。若得查勘修葺，各設閘版，專員董理。內河水大，則俟潮退啓版以洩其勢。天時亢旱，則俟潮漲起版以蓄其源。實大有造於江浙蒼生也。貴部院胞與爲懷，誠求保赤，與水利而助農功，自有卓識相應。咨會爲此。合咨貴部院，煩請查照，卽賜轉飭地方官勘明閘座舊址，酌議作何修整，依時啓閉，將見嘉湖蘇松等府農田，早潦有資，造福於地方者不淺矣。仍希示覆施行。

通飭各屬刻日完報檄

爲更定刻日完報之法，以儆積玩，以清案牘事。照得居官之賢否，卽見於職業之廢興。未有職業不修而可稱才能者。本都院自下車以來，事無大小，於批行之際，卽飭早結，猶恐泄泄從事，設立風火雷三催之法，頒行各屬遵依。限期勸勉警覺。總期案件早完，百姓得安。然在勤敏之員，不待限催，事件皆已副限審結。而怠惰苟安者，反恃有三催之限，卽一二催可結之事，亦必延至末催而後覆，甚且有頻催不應，以致文檄日密，而滯案愈多。若不刻定限程，勢必觀望效尤，漸成廢弛。徒事紙筆，穎脫屑焦，於事終無裨益。今更風火雷之法，爲刻日完報之法。但限期不寬，各屬必致草率，而處分不信。各屬不知惕勵，所謂刻日完報者，嗣後如欽部命盜案件，本有定限。本都院止以原行內硃標定於限前某月日申覆。違者照例參處。其餘各事件，並按各道司府州縣離省遠近，扣去郵遞時日，亦各立限期，以文到日爲始。各縣限五十日，府廳州限七十日，各道限九十日完報。卽硃標原行上限某月日內詳覆。聞有駁查者，量事之難易，以爲

遲早另定嚴限。一切完報之期。卽定於批行之始。此後再不頻催。如有限內萬難完辦者。許將難辦緣由。具詳請展。自立限期。准其照限完結。儻有限內不完。又不詳請展限者。殊限一逾。立提經承重處。本官記過。積至三次不改者。本都院惟有白簡從事。定以闕茸溺職參處。斷不姑容。蓋清慎勤爲服官之道。卽察吏之方。然清慎猶需察訪。而勤與惰卽見於辦事敏怠之間。昭然難掩。況不勤之人。非利令智昏。卽怠忽成性。所謂清與慎者。亦不可信。不行嚴處。何以勸衆。合行通飭。爲此牌仰該司道府縣官吏。照牌事理。嗣後除欽部命盜案件。照依定限查照。硃標詳報外。其餘批行事件。分別難易。務必遵照本都院所定硃限。之前詳覆。儻有仍前怠惰。不副限期者。除嚴提經承究處外。卽照所逾次數。飛章題參。決不姑貸。

申禁盤運米石檄

爲再嚴盤運米石之禁。以杜奸宄。以保民生事。照得閩省比年以來。幸賴天心眷顧。雨暘時若。米穀豐登。民間稍有起色。見今早禾已經收穫。米價理宜平賤。近查各屬所報米價。尙爾如前。不能稍減。皆緣奸牙布棍。暨不畏死。刁通外境商販。恣意盤運。或由海船於僻處偷運出海。接濟賊艘。或藉肩挑無幾。任意擔負外境。覓糶多金。汎口弁目。以前禁日久。遵奉懈怠。不行查拏。該管員弁。以年歲稍登。聽其盤運。不爲禁遏。所以米價難平。豐稔之地。亦似歉收之所也。夫閩地偏隅。被山襟海。田少人多。一年所出之米穀。尙不足以供一年之食用。稍有歉收。則告糶維艱。非比四達五通之處。可以朝發而夕至。若容奸販盤運。米穀爲之一空。將來乏食。則於何處可以糶買。合再出示嚴禁。如有仍前盤運米石出海。或肩挑米石出境者。

不論諸色人等。許其舉報就近地方官。立即查拏詳報。以憑從重究治。仍將所拏米石。給賞舉報之人。爲此牌仰該協照依事理。立即嚴飭所轄汛弁官兵。如遇前項搬運米石出境出海者。卽行拏解地方官詳報。以憑重處。儻該汛弁容隱不卽拘拏。或經訪聞。或被告發。定將該管官以失察指參。汛口弁兵。嚴提究處不貸。

駁審盜犯雷升等一案檄

爲大盜劫殺事。據該司呈詳盜犯雷升等夥劫張成月錢店一案。招由到院。本都院提犯親審。據雷升等咸供。各係乏食飢民。素不識認。上年三月二十六日。因赴賑廠吃粥。適遇毛七倡言搶米療飢。萍聚同行者。遂有十二人。是夜前至張成月錢店門首。關壽知其店多錢。起意用鑿撬門行竊。被事主知覺。啓戶出視。衆卽蜂擁入店搶錢。回至關壽家俵分而散。並未預謀爲盜。明火執械塗面及截傷事主情事。其所起鋼叉三眼等械。實係失主家之物。至阿胖一犯。堅供並未同行上盜。因關壽欠伊米錢。於二十八日索得錢七百文。實非分得之贓。後被供攀。刑逼誣認。各等語。據此。除人犯著令原差押回。詳文批發外。爲照承審盜犯。務先究明起意商謀。糾夥上盜確情。如果起意商謀而爲強盜。雖有矜恤之心。亦未可輕爲寬縱。乃若本係窮民。初未預謀盜劫。因飢所迫。思搶奪以苟延殘喘。臨時迹同大盜。而情實非盜。則司民牧者。自當詳察其情。未可草率重擬。致傷民命也。如此案見存五犯。本都院庭審之下。極加窮詰。雖或狡供。遽難全信。但據雷升等辯稱。伊等旣爲大盜。何不直入失主內室。席卷衣飾重資。止搶得二十餘千之錢。等

語。揆此。或各犯當時志在乎搶而非強劫。未可定也。且又據供。係執鑿撬門行竊等語。則又似共謀爲竊矣。亦當究明臨時行者誰人爲強。分別擬議。今該司均擬重辟。似有未協。合亟駁勘。爲此。仰司官吏。查照來文。即將盜犯雷升等立速確審。是否造謀爲盜。有無棍械。阿胖曾否上盜。抑係狡飾。錄取切供。另招詳解。以憑審題。毋得拘泥成案。致干失入之咎。慎速慎速。

劉濟公布店被盜一案駁勘江浦縣誣盜檄

爲呈報浦口等事。據該司詳稱。江浦縣劉濟公布店被盜。差捕趙奉等拏獲馬虎山到案。供認夥劫。續獲尹麻子等。亦各承認。至本年三月內。拏獲真盜徐繼龍、楊之秀。審供同夥七人。並無馬虎山等在內。復訊虎山等。始供在先畏刑妄認。除胡明脫逃不議外。將趙奉問伊不應。重杖。馬虎山照自誣誣人律。重杖。等情。先請咨部。前來。據此。查馬虎山等皆係平民。當趙奉等拏獲到官。必極口呼冤。焉有無故甘認強盜大辟。自取殺身之禍。況查馬虎山初供。八月初四日夜。往劉家後門。用繩拴石撞開進去。劫得布匹、銅錢、葛布鞋、紅紬被等語。夫馬虎山既未行劫。劉濟公布店。其所供上盜劫賊情事。何以恰與失主報呈失單相符。明係捕役私拷逼認。問官酷刑鍛鍊所致。苟非真賊就弋。則馬虎山等幾爲泉下冤鬼矣。查律載。誣指送官。依誣告論。該司並不按律擬議。止將趙奉問以不應。重杖。又不將失察職名開報。據以咨部。必干嚴詰。再胡明係拏馬虎山首犯。今遽稱在逃。是否捏飾。抑係故縱。除詳批發外。合亟駁勘。爲此。仰司官吏。查照來文。即提趙奉并胡明到案。立速確審。如何誣拏拷認。該縣如何刑逼招承。務得實情。取具切供。按律

妥擬。并開列應參職名。另招詳報。以憑核奪。例限已滿。毋得徇庇遲延。致干未便。

駁勘顧少連家被盜一案檄

爲夥盜劫殺事。據該司呈詳。婁縣顧少連家被盜。獲犯陳二等一案。招由到院。據此。爲照此案事主原報。被盜三十餘人。各執明火軍器。破牆入室。傷人放火。劫失金珠衣飾器皿等物。計七百餘宗。是盜案賊衆。賊多。莫過於此。據審陳二等供認。同行止有十三人。兩人把風接遞。三人在船看守。其入室劫掠者。惟陳二等八人。認分之賊。又不及十分之一。與原報情詞大相懸殊。則盜夥數目。是否官捕勒減規避處分。或係事主妄報。冀圖聳聽。原劫賊物。是否經捕侵剋分肥。抑係各盜隱匿不吐。必須窮究明確。方可定爰書。成信獄。今承審各官。並不細加推究。殊非信讞。且閔大等初獲到案。咸供王三係同行分賊之犯。拏獲王三。自認同夥爲盜分賊。口供鑿鑿。迨閔大等病故。新縣劉令覆訊。王三改供被誘搖船。所得之賊。係各盜給與船錢。因而陳二等卽爲辨白。夫賊證未確。罪疑惟輕。固難深入。若倏承修辯。關乎生死。尤宜詳慎。該犯是否賄囑見盜。通同改口脫罪。或係初審畏刑妄供。該司尙未勘出真情。何得輒行開脫。況陳二先在華亭縣審供。起意是顧少連家人柳仲如。他於八月裏領去看路。到十一月初四日去打劫等語。解至婁縣。兩次審訊。俱供柳仲如領去看路。原要同去。行劫時。他不曉得。不曾去。及解府審改供。仲如領看路徑。原出無心。前後互異。其因何互異之處。未據訊明。再檢查顧爾玉被盜一案。司招並無代盜操舟之人。今稱盜犯沈老佛係顧爾玉等案船戶。又與顧案有夥盜張品尙未拏獲。此案已獲之張二又名品。是否卽

係顧案之逸盜。或顧案另有其人。亦未查訊明白。至陳二在華邑供分賊衣三件。白綿十四兩。綿已用掉。後解婁縣。初審供亦相同。及追起該犯名下贓物。內有湖綿十四兩。并起錫壺、馬褂等件。其綿是否原贓。錫壺等物。既未供出。何以知爲盜贓。一併起解。且在何處起出。前供因何互異。歷審並無一語訊及。事主原駁被盜。械傷家僮。并打傷伊子。鄰佑。各盜供係沈茂一人毆打。又供沈茂止帶叉口進內。並未持械。供詞亦屬矛盾。至於張八一船。如果在黃浦洪濤急流中沖翻。人賊並落波臣。在盜犯或可倖生。其船焉能隨時駕回。今稱贓物翻河。船仍張八搖去。已屬捏飾。何況先供本無張八之船。直至覆勘。方始添出。其爲賊無著落。捏造口供。情更顯然。又近奉新例。捕役拏盜到官。必訊明拏獲根由。或係蹤迹敗露。何處踴獲。或係訪聞端的。何人引拏。取具捕役供詞入招。等因此案初獲閔大、李才。並無賊證。捕役在何地方。何以知其爲盜。卽拏解官。未據聲明。亦未訊取原捕口供入招。均屬滲漏。再如婁縣知縣陳又良於四十九年十一月三十日被劾卸事。同知唐之稷於十二月二十日署篆。至上年四月二十五日卸事。是以盜犯沈茂、張二於上年四月初九、十五兩日病故。前司於吳瑞生盜案將唐同知承審職名開報請參。此案盜犯閔大於四十九年十二月初一日身故。柳文、沈鳴玉於上年四月十二等日身故。該司乃將前任陳令承審、監斃職名報參。舛錯已極。事關題達重案。豈容如此率混。除詳批發外。合亟駁勘。爲此仰司官吏遵照來文。卽提此案盜犯并原捕人等。再加嚴究。當日各犯在何地方。如何敗露。致被拏獲。同夥上盜實有若干。事主呈報盜夥三十人。是否確實。認分贓物與失單不符。是否經承捕役通同侵剋。或係各犯懼追隱

匿王三一犯果否被誘搖船。或係改供圖脫。事主家人柳仲如有無引線知情。已故沈老佛於何年月日被獲到官。是否係顧爾玉案內船戶。張二又名張品。是否即係顧案逸盜。其陳二供認贓物。因何前後互異。該犯名下見起各賊。究於何處起出。是否俱係顧少連所失原物。事主家僮並鄰佑人等確係何盜打傷。沈茂上盜時曾否執械。張八之船據稱在黃浦連賊翻溺。是否經捕囑盜捏供。或係各犯通同狡飾。逐一嚴究明白。取各切供。追贓給主。定擬妥招。開列應參承審監斃各職名。連人詳解審題。仍先將該縣從前接審遲延職名。卽日叙具簡由詳報。以憑核參。展限毋得仍前延混。致干重咎。

駁勘張元隆船隻有無在外逗遛檄

爲奏聞事。據該司審解余元亨等頂名冒籍。駕船在洋行駛。張元隆奸詭叵測。保領關縣照票。一案人招到院。據此爲照海洋盜賊。必與內地奸徒互相聲援。方可肆無忌憚。本都院於上年十一月間接准部文。搜緝海賊鄭盡心等。巡察沿海各口。訪得奸牙張羽可。卽張元隆。開張洋行。招集異鄉匪類。廣置洋船。詭捏姓名。冒領照票。往來東西二洋及關東等處。行蹤詭秘。稔惡昭彰。正在密擊查究間。因提到崇明水師營盤獲余元亨等人。照不符一千人犯。訊據供出照票亦係張元隆代領給付。隨飭令署上海縣事常州府通判周葑。提究元隆。止據出具收管呈。近未經審供詳報。迨本都院搜緝事竣。回署提審。始據該署縣詳稱。張元隆已於上年十二月二十四日病故。該縣以收管之人。不先報病身故之後。又不驗明具結。率以驗文申報。當經本都院將余元亨等是否海賊夥黨。并將張元隆平日擁貲結納。羽黨甚多。具疏題明。

業將題過各緣由備檄該司確究在案。今據該司招稱：張元隆奸詭叵測，顯屬可疑。本應嚴查重究，但奉部審鄭盡心等供稱並不識認，且已病故，無從究詰。實屬厚幸等語。查元隆雖稱病故，尚有伊弟張思永、伊姪張藻文、張心佩、張齡千，皆爲元隆手足腹心，朝夕管事之人，更有假張思永的名余元彩，又名張仲泉，供係在行經管討帳。又有曹鳴岐供代元隆管船，上年前往山東被盜，係在山東頂名具報之人。又有沈漢修等俱代張元隆在行料理，則元隆之素行不端，實思永等附和助惡。且據張思永供：時常見余元亨在哥子行裏賣貨，有五六年了等語。而張羽可在海關保欠各船商稅銀八千兩，現據該關著落張思永等清追，可見同惡共濟之輩。當此水落石出，俱應一并究擬，豈容任其狡卸也。至海賊鄭盡心等雖經擊獲而未獲之盜尚多，何得以鄭盡心等供不識認張元隆，遂置不究，見准部覆。審據鄭盡心供：有我認識之陳朝貴告訴我，說在山東地方搶了一隻不知姓名客船，如此告訴過，是否張元隆之船，他將船燒與不燒，我俱不知道等語。該司自應查提張元隆原船水手，逐一確究，其船果否被盜劫焚，或即係陳姓自焚之船，務得真情，未便含糊了事。又上海縣造報自十五年洋船冊內，開有船戶余亨，其舵工張任，水手林永瑞等姓名，與華邑余元亨船上耆舵、水手姓名俱各相符，均係張元隆保結。今余亨一船，見係何人冒頂撐駕，又鄭盡心之夥賊高允泮在閩供稱，原有三隻船，在海上陸續投充五船，而張元隆船上水手王貴之據上海縣訊供，亦稱元隆共有五船同開出海，則陸續投充之五船，是否即係張元隆出洋船隻，俱應提究明確。本都院訊據華亭縣經承沈來時，據開張元隆在華亭縣領過照票，有楊日昇、王勝吉、

何元吉、邵元隆、吳萬隆、王永順、陳茂盛、陳璧、吳天成、周嘉、李長吉、張元嘉、吳聖興、陳起勝、陳祿吉、吳茂順、葉楫臣、林文、林發、張除祥、蕭鶴鳴、陳泰興、戴元生、吳起元、張盛、張南等，連余元亨、張永昇，共二十八船。華亭一處卽有如許多船。其在別縣移甲換乙，詭領照票，自必不少。合之本都院訪問，元隆立意要洋船百隻，已有數十隻，藉稱貿易，逗遛在外，久不歸里。該司自應遍查元隆名下自置及保領船隻，共有若干，出洋未歸者若干，逗遛何處，撈駕何人，奚容隱匿不究，更可異者。曹三與馬祖同在賊船放回之人，本都院訊其自閩至蘇一路水陸住宿之處，所供互異，或係冒名頂替，亦未可定。又據曹鳴岐供，在東省止具呈投遞，並未取供，與山東撫院咨內所開審問被劫情形大相逕庭。未據研訊確切，又脫逃之郭茂宇，據王令稟稱，顧元供係眉濃眼陷，而乍浦緝獲之郭細弟，又據王令稟稱，原差顧元前往驗過，亦係眉濃眼陷之人，但不是郭茂宇。今訊該差，又稱在蘇州候審，并不曾往平湖。其差往乍浦者，係夥伴王章、王和，則乍浦緝獲之郭姓，顧元既未往驗，何以知不是郭茂宇？王令顯有捏諱情弊。再本都院去冬在上海縣面會崇明穆總鎮云：我營裏拏住的賊船上人，崇明縣都放了。隨問崇明縣，據稱人是福建人，縣照是華亭給的，已將人犯起解華邑審訊。及問華亭縣，又云：崇明止將空人解來，而貨物與船隻並未解到，無從審訊。必得驗明是何貨物，數目若干。某貨是某人的，方好究其貨物之所從來，或係盜劫，或係買賣。隨令一千人犯赴崇運取貨物船隻，以便質審。至今尙未運到。在華邑並未見船與貨，何由而知其是劫是置？此遲延推諉之咎，兩縣俱不能辭其責也。再余元亨等人犯二十五名，崇邑止差顧元一人押解，迨顧元押解

赴松。雖遇魏令公出。并不解交。佐貳官收管。竟將人犯私交華差張禾一人。張禾亦不奉官票。擅自接領。致犯脫逃。其中明有通同賄縱情弊。而崇邑王令既知余元亨等逃回境內。拏獲收禁。將脫逃之犯不卽關明華邑查拏。亦不責令原差偵緝。則該令之少差解役。與僉差不慎。縱犯脫逃。咎有攸歸。未便竟置不議。再查案內有水手黃君龍、林祥弟、周士榮、及搭船人林和卿、余發、許連、陳子奇等。崇明縣與府司審供籍貫不符。確係何處人氏。未據究訊明確。種種未協。合亟駁勘。爲此仰司官吏遵照來文事理。卽將指駁各情節逐一嚴加究審明白。按律確擬另事妥招。取應參各職名一併開列詳解。以憑審題。毋再率混遲延。致干未便。

飭禁橫抽鹽稅示

爲嚴禁藉稅橫抽擾害。以安民生事。照得泉屬產鹽之區。原有潯、汭、浯、惠、四場。商販行鹽。載運車橋港貿易。畫一徵輸。故名曰車橋鹽稅。凡四場貿易鹽石。設立徵稅。以便商販行運。而無透越漏課之弊。法甚善也。詎知年久弊生。近聞沿海各處。不遵舊規。多設稅館。差役巡丁。勒索擾害。任意橫抽漫征。無忌深可痛恨。查鹽例開載三十觔無引票爲私鹽。負鹽易米者勿論。今訪得車橋各處。不論孤貧寡婦。與夫負鹽易米者。或三五觔。或十餘觔。一被捉獲。立拏解府。入門不問曲直。重責枷號示衆。再汭、惠、浯各處居民房舍。僅可藏身。遮蔽風雨。邇來府官與鹽商勾結爲莫逆。計議設印。令巡攔將日間曬戶所出之鹽。日暮抵家。於鹽上蓋印。巡攔皆無賴棍徒。藉名蓋印。或乘黃昏竊取財物者有之。或俟暮夜引賊盜牽耕牛者有之。

或欺矚丁孤弱戲弄妻女者有之。似此橫抽多方設館。擾害良民。言之殊堪髮指。本應拏究。姑亟出示禁革。爲此示仰泉州府官吏商販稅役矚戶人等知悉。嗣後車橋鹽稅每石只許徵銀一分。照舊設館徵收。如有沿海各處私設稅館。濫收稅銀。一經訪拏。從重治罪。差役巡丁人等亦不得嚇騙孤貧寡婦。負載鹽勛。以及藉名蓋印。抵家擾害。爾經徵官務宜痛革前弊。俾百姓省一分之脂膏。卽需一分之實惠。自必急公輸將。不敢透越漏課。而於國賦民生均有裨益矣。儻有陽奉陰違。仍蹈前轍。不論諸色人等。許卽據實赴轅控告。官卽飛章參處。役則立拏杖斃。決不姑寬。各宜懷遵。毋貽後悔。

諭植桑養蠶示

爲勸諭蠶桑以敦本計事。照得人生飲食而外。衣服爲先。王道耕稼之餘。蠶桑是務。此五畝之宅。所以有牆下之樹。而不毛之家。難逃於里布之罰也。我皇上念切民依。萬幾之暇。御製耕織二圖。凡所以教蠶教桑者。亦旣與稼穡並重矣。矧茲閩邦。氣厚風和。繭絲年堪四熟。暑多寒少。桑柘歲復長青。有此自然之美利。竟爾棄置弗收。本都院之所以深爲爾惜也。合行勸諭。爲此示仰撫屬人民。於凡所在曠土平原。務宜多種桑木。凡各處人家婦女。務須操習蠶工。當知勞則生善。古后妃尙爾親纈。寒必須衣。五十者方得衣帛。在昔章太守牧容州。勸課耕織。而郡無飢寒。沈令君宰建康。教治桑田。而民日富庶。本都院於爾閩民。亦深有望焉。特示。

勸諭農隙開池蓄水溉田示

爲耕鑿乃相須本務。豫防實補救良圖。特示勸諭。以免廢業事。照得盡人可以回天。有備方始無患。閩省山多田少。年際豐稔。爲計一歲之出產。不足供一歲之口食。儻遇旱虐。必至饑饉。夫有田必須有水。有水然後有耕穫。有耕穫然後上以完國課。下以資民生。則因土宜而謀水利。最爲要著。如田鄰溪河。則可車水潤田。居山谷。則恃泉源流濟。至於平原曠野。不近溪河。又無泉源。一遇亢旱。目睹廢業。則鑿井開池。以爲防旱之計。是亦補救之一策也。當此三冬農隙之時。於各田會聚之區。開一小池。池分各圳。以通各田。又於每田相度土宜。一丘鑿井一口。豫蓄水源。若遇夏秋亢旱。則將此各井之水。通力運入池內。使之分流各圳。以爲灌溉各田之用。卽云難比甘霖。得霑普徧之澤。亦可暫救數日。以俟雷雨之敷。此乃本都院一片婆心。爲爾等豫籌捍災之至意。合行出示曉諭。爲此示仰村落耕農人等知悉。際此三冬農隙之候。務要於各田會聚之區。通力合作。開一小池。池分各圳。以通各田。又於每田相度土宜。一丘鑿井一口。豫蓄水源。以爲來歲不時之需。其開池鑿井用費。各田主出給口糧。各田戶出工力作。毋得故違。儉安懶惰。自貽伊戚。

勸諭招商販米平糶示

爲勸諭購米於價賤之區。平糶於價貴之地。梓桑被惠。貲本仍贏事。照得江蘇地方連遭水旱。去年雖稍獲有秋。而粒食猶艱。窮民尙多枵腹。本都院甫值下車。目睹城市之中。途有餓殍。其鄉村溝瀆。恐或不免。叨在封疆。寢食爲之俱廢。查從來救荒之策。莫如購米平糶。而欲望平糶。莫如米艘連艘。江南素稱殷庶。

自紳衿大家以及里巷富室。豈乏好義樂施之人。但有餘之名一著。派捐之累堪虞。或郡邑稱貸。或監司誅求。拒則招尤。應則傾橐。是爲善以賈禍也。本都院飲冰固矢。拔薤亦嚴。今而後察吏誠民。自當仰體聖天子眷顧東南至意。擇殷剝削之害。庶其有瘳乎。夫富名可居。好善亦易。目下惟有湊貲販米載歸。散糶一法。可以濟緩急。而通有無。各屬有司。亟宜實心鼓勵。俾紳民見義必爲。乘此春融冰渙之時。各出貲本。前赴江楚產米處。所購運來南。照依時值發糶。或量爲酌減。源源不竭。務使米日多而價漸平。窮民藉以得活。陰功莫大焉。況貿易別貨。每過一關。按額納稅之外。陋規不少。若購米救荒。本都院見在咨明彼省督撫。曉諭平價糶賣。毋許遏糶高擡。并卽照會各關。止收正稅。耗羨悉蠲。於是驗照揚帆。毫無阻滯。所費旣省。獲利自多。爾商民亦何憚而裹足也。合就出示勸諭。爲此。通曉該屬官吏紳衿商民人等知悉。凡富室大戶。互相勸勉。各出資本。先赴地方官報名。申請本都院給發護牌。前赴江楚採買口糧。如遇關津隘口。資照驗放。運回之日。發糶賣下銀錢。陸續購運。將見麥秋未屆之前。焚焚小民。無慮青黃不接。惠洽桑梓。澤綿子孫。一轉移而數善備矣。本都院軫念飢黎。拭目盛舉。早一日則翳桑受一日之惠。毋得觀望遲延。有負諄諄勸勉至意。如有地棍奸胥。從中阻撓。或藉端勒索。一經察出。定卽嚴拏重處不貸。

正誼堂續集卷之三

序一

諸葛武侯文集序

自三代以下。聖學失傳。雖有奇傑之士。不過隨世以就功名。而於聖賢治心經世之道。概乎其未有聞也。諸葛武侯應先主之聘。出扶漢鼎。託孤寄命。討賊出師。雖功業未究。而舉動光明。大節偉然。三代以下。不多見也。武侯之學。其淵源所自。不可考。然觀其言曰。非澹泊無以明志。非寧靜無以致遠。此聖賢治心經世大本領。武侯蓋得之矣。故能不爲物欲所搖奪。而有以養其精明之識。剛大之氣。經綸事業。皆從此出。方其躬耕南陽。抱膝長嘯。優游草廬間。若將終身。一旦感三顧之遇。遂許馳驅。永安受遺。不負顧託。是莘野之阿衡也。平定蜀漢。經略中原。制陣行師。隨機應變。是鷹揚之尙父也。開誠布公。集思廣益。而鞠躬盡瘁。不計成敗利鈍。則周公虛懷下士之衷。而孔孟分別義利之大旨也。程子以爲武侯近王佐之才。又以爲有儒者氣象。豈不信哉。至其經事綜物。立法施度。史氏之所贊。與後世所震而稱之者。皆其設施運用之迹。而未睹其本領之所存也。吾以爲三代而下。若武侯者。其於聖賢治心經世之道。亦庶幾矣。世遠書亡。欲睹其全而不可得。陳壽志載其書目二十四。自開府作牧以下。當是武侯經濟大略。今已無存。獨世

所傳心書。以爲武侯作。而陳壽書目不載。然按五十章中。略於將兵。而詳於將將。本於自勉。而歸於和人。詞旨正大嚴密。軼孫武。司馬之上。謂非武侯所著不可。若其表疏書教。見於史策者。雖片言斷簡。而公誠之心。形於文墨。其陣法之變化。占驗。制器之神工。異巧。皆有實用。亦窮理格物者所當考。余故採而輯之。使學者讀其書。論其世。而景仰其人。不徒作三代以下人物也。

陸宣公文集序

古之君子。抱經濟之宏略。不幸志不得行。而忠言讜論。欲以壯國勢。而格君心者。足爲當時之藥石。萬世之龜鑑。此非才無以充其志。而非學無以正其才。吾於唐得陸宣公焉。公之志存忠愛。而才優經濟。人知之。而其學一本於聖賢正誼明道之旨者。人未必知也。宋蘇軾進公奏議。稱其智如子房。而文則過。辨如賈誼。而術不疏。夫智哉留侯。善藏其用。公自翰林至爲相。直節勁氣。無所避忌。烏在其用智也。至於賈誼。辨則辨矣。然其指畫形勢。多出於利害之私。而公之告君者。獨惓惓於天命人心之去留。忠邪義利進退消長之際。今讀賈生之文。雄偉可喜。猶雜以策士縱橫之餘習。而公之文。周詳委曲。惻怛懇摯。洞悉情事。而愜適人心。故草詔之下。能使將士讀之流涕奮發。而猜忌如德宗。猶能聽納。以收其益。蓋感人以誠。而不在於辨。又豈但其術不疏而已。然則蘇氏之論公者。公固未必許爲知己也。公之言曰。吾上不負天子。下不負所學。蓋其自信之篤如此。方其從幸播遷時。天子倚仗如左右手。公之行其所學也易。及乎平定之後。見忌於竇參。取嫉於裴延齡輩。德宗事事疑公。與之相左。公之行其所學也難。而公審諤之誠。初終

不少變非有得於聖賢正誼明道之學者不能也。大學戒專利而歸於用小人。德宗以小人爲腹心而疑君子如仇敵。小人言利有以中之也。公隨時隨事陳善閉邪。其大旨在乎散財得民。遠小人而信君子。此大學之旨。而孔曾思孟之傳所不能外。讀公之文而不能推公之學。豈知公者哉。公之志不得大行於時。而其生平所學。斷不少負。固不在於君之用不用也。余故選公之集而刻之。因本其所學。以告世之讀公之文者。

柳文序

唐世文章稱韓柳。柳非韓匹也。韓於書無所不讀。於道見其大原。故其文醇而肆。柳自言其爲文。以爲本之易。詩。書。禮。春秋。參之穀梁。國語。孟。荀。莊。老。離騷。太史。其生平所讀書。止爲作文用耳。故韓文無一字陳言。而柳文多有摹擬之迹。是豈才不及韓哉。其見道不如故也。然李樸有言。柳醇正不如韓。而氣格雄絕。亦韓所不及。吾嘗論韓文如大將指揮。堂堂正正。而分合變化不可端倪。柳則偏裨銳師。驍勇突擊。囊沙背水。出奇制勝。而刁斗仍自森嚴。韓如五嶽四瀆。奠乾坤而涵萬類。柳則峨眉天姥。孤峯矗雲。飛流噴雪。雖無生物之功。自是宇宙間洞天福地。其並稱千古。豈虛也哉。雖然。柳子所工者。文也。余所執以繩柳子文者。道也。謂柳子毫無見於道。固不可。然道有離合。豈可因其文之工而掩之乎。擇之約。論之嚴。不爲柳子恕。而後可以見柳子。

韓魏公文集序

宋時稱四傑。韓、范、富、歐陽。而韓冠其首。蓋讀公家傳。表奏制策諸篇。而知公之立大功。成大名者。非無本而能然也。余嘗謂立功之難。難於有識。有量。有膽。有才。四者公殆兼之。公歷事三朝。輔相十載。其間任三司。擢諫垣。出鎮邊陲。入參樞密。經綸事業。難更僕數。方公爲樞密時。皇嗣未立。卽請置內學。教宗子。及公秉政。又論建儲立本。繫天下心。而英宗卒踐大祚。逮至兩宮危疑。款曲調護。進對慈壽之語。同列皆爲之寒心。投杖入見。曾公以下皆汗流浹背。此豈尋常所及者。而公之德量過人。抑又難也。公嘗言。始學行己。當如金玉。不受微塵之污。及其成德。有所容受。亦爲無害。是以平日與人和易。絕無私嫌芥蒂。明足以照小人之欺。受之而不形於色。在政府時。每議事。有至厲聲相攻。不可解者。公概置不問。俟其氣定。徐一言可否之。歐公性嘗褊。輒自歎曰。蔡百歐陽。修不足望韓公。而孫元規亦自訴於公曰。沔真小人。相公知沔。沔不知相公。其見服於人如此。公又謂成大事在膽。生平未嘗以許人。往往自許也。觀其孤忠仗節。一遇大事。輒以死自處。公惟有識。有量。有膽。而才乃大。毅然報國之忠。直哉匪躬之節。弘勳峻烈。凌轢一時。其所蘊蓄有由然也。今讀公所爲文。惻惻款款。鞠躬盡瘁。閱五十載如一日。公生平惟一本於誠。經濟文章。出之有餘裕矣。

三蘇文序

朱子曰。李泰伯文字得之經中。雖淺。然皆自大處起議論。老蘇父子自戰國策得之。故皆自小處起議論。

俱移不覺權術之用。生於心而形於文字。莫有知其弊者。朱子自謂老蘇文字初亦喜看。後覺自家意思都不正當。以此知人不可讀此等文字。夫文字愈工。議論愈快。其移人愈速。朱子尚覺其如是。況學者乎。苟惟蘇氏之文是習。其不至爲心術之壞也幾希。余選三蘇文。老泉聊存一二。東坡子由亦擇其醇正者錄之。其多從小處起議論者不錄。知道之士必能識予去取之深意也。

張橫渠先生集序

自堯舜禹湯文武周公孔子以道相承。爲萬世立極。而子思孟子從而發明之。斯道始大著。孟子沒而微言絕。歷千餘載。能毅然以斯道自任。無所師承。而刻苦自礪。以底於成者。惟橫渠張先生。先生著西銘。正蒙。經學諸書。呂與叔撰行狀。以爲窮神化一天人立大本斥異學。自孟子以來未之有。明道亦言西銘道理。孟子以後無人及此。是豈虛稱也哉。閒嘗竊讀先生之書。其高極乎乾父坤母之大。而實不離乎吾體吾性之常。其詣必造於窮神知化之妙。而實不外乎存心養性之功。其旨歸在乎有無合一而動靜虛實之幾。灼然不爽。其致用務爲化裁推行以盡利。而隱微幽獨之際。防之不稍懈。其學之正且大。爲何如哉。後之儒者。或桎於見聞之狹。或驚爲高遠之論。其於道何有。余故編輯是集。以破庸淺之見。以祛習俗之陋。俾學者有所操持存養。以趨向於本原之地。而因以自盡其心。雖然。未易言也。張子之於道。蓋自謂俯讀仰思。求之六經而後得。今學者於六經孔孟之言。不日浸灌於胷中。而驟而語之。未有不河漢其言者。

且無張子畫爲宵得息養。瞬存工夫亦無以識其用意之所存。余固非知道者。然不敢謂無志於盡心之學。略附管見於正蒙。餘俟同志君子共爲討論。深造而有得焉。是亦張子之志而已矣。

朱子文集序

自鄒魯而後。天下言道德學問之所出者。曰濂洛關閩。然集羣聖之大成者孔子。而集諸儒之大成者惟朱子。士生千載下。欲明聖人之道於千載之上。苟窮之不得其術。探之不見其原。守之不知所宗。而欲自命爲學。是非不謬於聖人。蓋亦難矣。歷觀古之君子。必有道有德。而後其成已成物爲有據。成已成物無憾。而後其文章爲足貴。此理之不易者也。惟是人之所學不同。而其所言亦異。得於身者。或無以及於人。顯著於一時者。或不足以垂教於萬世。此讀書論世者所以每恨全德之難。況本正心誠意之實學。肩前聖後賢之重寄。一一發明而折衷之。豈易言哉。文公興教自閩。值宋中葉。其道雖未大行於天下。而著書立說。昭示來茲。俾學者有所循以入聖人之道。其功不在孔子下。我皇上崇文重道。表章大儒。爲天下式。親製訓言。警飭士子。亦旣煌煌諄命之矣。顧茲閩疆。爲先賢闕里。其遺風流澤。必幸有存者。不佞謬膺簡命。忝撫名邦。又況髫髻訓行。服習有素。固知舍此而外。不足以言學也。公所著書。品目繁多。簡帙浩大。謹先輯其文之至精至粹者若干卷。以資講誦。蓋欲學者專務其心志。以約求其旨趣。則知學之有本。不爲見異而遷。因以循其先後本末之序。致其操存涵養之功。而歸乎仁義中正之域。則正心誠意之學。亦莫不畢具乎此。而朱子之道得矣。朱子之道得。則近而濂洛。遠而鄒魯。其道將無乎不得。於以仰答聖天子

械樸作人之盛。其在斯乎。自非然者。求之不得其宗。學之不知其要。雖日誦法乎聖人之道。而茫乎無畔岸之可尋。浩乎無津涯之可指。而陽儒陰釋之徒。又徧爲異說。以淪亂之。其不至迷惑。錮蔽載胥及溺者。幾何。余所以急爲編輯。欲使學者從事於此。以得朱子之指歸也。是爲序。

張南軒文集序

道之在天下也。有一二人開之於先。而統系相承。遂有知所向往。以成其學者。固其人之克自振拔。亦良師友與有力焉。自鄒魯既遠。聖學不明。異端浸熾。至宋伊洛夫子出。始得其宗於數千載之下。相與講心性之微。嚴義利之辨。而陷溺已深。信從者寡。高者競尙穎悟。而其卑者則不過掇拾詞章。以弋取富貴。習俗移人。賢者不免。蓋當其爲學時。而本原早已非矣。南軒先生爲忠獻公嗣子。幼習庭訓。已得忠孝傳家之旨。及長。師事五峯。慨然以聖賢自期。其平日之講究心性者。蓋深契乎伊洛之遺言。而其所得力。則尤在辨析義利。不使有毫釐之差。故習次灑然。光明坦易。至於入侍經幄。出典名藩。無非本此而措之。蓋有古大儒純臣之風焉。其與考亭夫子志同道合。往來切磋。舉凡天道之精深。聖言之奧妙。德業之進修。行藏之大義。無不有以共悉其源流。而一歸於正大。朱子嘗極稱之。以爲天資甚高。聞道甚早。其學問日新無窮。其議論出人意表。此亦可以知先生矣。夫以先生之克自振拔。而又得良師友如是。使天假之年。則其作爲文章。播諸事業者。詎可易量。而享壽不永。惜夫。今其書具在。予懼傳之不廣也。因爲校選付梓。俾後之讀先生之書者。瞭然於義利之分。而嚴辨於幾微之間。以不迷於所往。斯道之傳。實嘉賴之。

呂東萊文集序

東萊呂氏所稱宋文獻舊家也。自四世祖原明先生嘗從伊川程子遊。因以儒學名於世。蓋淵源授受累代相承。其所觀感者深矣。道之絕續顯晦。賴有志之士擔當負荷於其間。使非德宇寬洪。器量閎廓。任重道遠。不以造次顛沛而少衰者。曷足以與於斯哉。惟先生恬淡寡欲。刻責奮厲。稟之既厚。而所養益深。取之既博。而所就益粹。學以關洛爲宗。而充其所得。不見涯涘。朱子謂以一身備四氣之和。一心涵千古之祕。推其有足以尊主而庇民。出其餘足以範俗而垂世。是可得先生之大概矣。予嘗慨俗學拘於氣質。汨於勢利。其居恆因循苟且。不能自克。是以頽惰縱恣。迄於無成。史稱先生少卞急。一日誦孔子言。躬自厚而薄責於人。忽覺平時忿懣渙然冰釋。先生亦嘗示人爲學必須於氣稟資質上驗之。如滯固者疏通。顧慮者坦蕩。智巧者易直。苟未如此轉變。終難得力。又嘗與南軒書曰。從前病痛。良以嗜欲蠱薄。故卻欠克治經歷之功。思慮稍少。故卻欠操存澂定之力。此其講磨深至。痛省力懲。勇於自克。爲何如者。要惟是立志既堅。不爲血氣所使。是以邁往直前。日新月異。卽至臥病三載。而左圖右書。析疑辨難。未嘗晷刻去諸懷也。嗚呼。先生篤志力行如此。而又嘗抑然自下。樂取諸人。以視金谿永康永嘉諸子。徒以聰明才智尙人。而終墮於老釋溺於功利者。相去奚啻霄壤哉。使先生克壽。其引掖後進。傳道來茲者。考亭當不得獨當其盛。而先生甫逾強仕。溘焉長逝矣。茲哀集先生所爲文凡四卷。付之梓。而因綴其語於簡端。

陳北溪文集序

道之顯著於天下也。賴有師傅以昌明之。良友以輔翼之。更須循序漸進。朝夕研窮。於以探心法之淵源。究性學之奧蹟。靡不豁然貫通。而後矢之於口。筆之於書。無非日用平常之理。直如布帛菽粟之不可或缺。令後之覽者。一遇目而卽知。聖賢源派。不爲異學所淆汨。豈非吾道之光而學士之幸歟。北溪陳先生賦委瀟灑。穎悟過人。自少卽高自期許。不同流俗。嗣得考亭夫子所編近思錄讀之。確然深信而不疑。第以無由親炙爲憾。閱十年。而考亭夫子出守其鄉。遂錄自警詩以贊。殊恨相見之晚。因訓以凡閱義理。必須尋究根源。先生日求其所未至。而於下學上達之序。人心道心之微。莫不從其根柢而辨之詳。講之審。朱子嘗稱其善問。而以吾道得人爲喜。是以學日進而道益明。闡明正學。排斥異端。著有道學體統等篇。似道似學二辨。不可謂非見道之切。衛道之嚴。而克自振拔者矣。無如功不及竟。而齋志以歿。然道以人傳。人以學顯。先生爲朱門高弟。誨人不倦。隨口授書。如字義。四書口義。禮詩女學諸書。以及筠谷。濂口所聞。尤爲深切著明。其書具在。足爲後學津梁。慮其傳之不廣。茲復輯往來書問。并記序銘贊等文。刊成一集。俾後之讀者。知先生之所學。皆由切實致功。尋求根柢而出。學者苟循是以探索原本。由濂洛關閩之遺言。上追古帝王危微精一之旨。不難直接薪傳矣。又何有道之不明。而學之不正哉。是爲序。

文文山集序

天地有剛大之氣。炳之爲日月。奮之爲雷霆。峙之爲山嶽。流之爲河海。其在人。發之爲文章。矢之爲節義。一而已矣。夫人於天地並列而稱三才者。惟其能全是氣也。孟子所謂養之無害則塞乎天地之間。文章

節義皆由此出。非豪傑之士其孰能之。宋丞相信國文公遭羅末造。出師勤王。崎嶇山海。及祚移身執事。不可爲從容伏鎗。以顯國家三百年養士之報。其節義懷懷垂宇宙間。嗚呼偉矣。乃讀其文章。光明俊偉。磅礴敷暢。如日日之爲照。而雷霆之爲威也。山嶽之爲高。而河海之爲潤也。蓋自寶祐四年大廷對策時。極陳法天不息之學。理宗親擢第一。識者已爲朝廷賀得人。至其不幸幽囚四載。丹心碧血。形於文墨。觀者無不流涕而悲痛。正氣一歌。足以扶綱常而立人極。千古文章孰大於是。士當優游平世。弄翰揮毫。率爲柔情媚態。取悅耳目。譬如時花美卉。轉眼都隨風飄蕩。無復存者。其文如是。則其爲人必依阿淪忍。苟且取容。遇小利害鮮不喪其所守。而況能臨大節而不可奪乎哉。先生之文。非孔孟程朱之旨不談。非忠孝仁義之言不道。蓋文章與節義相輔而行。所謂豪傑之士。信道篤而自知明者。微先生其誰與歸。讀其書想其人。亦可以興起於百世之下矣。是爲序。

謝疊山集序

自古不二心之臣。甘心餓死而不悔者。於商得二人焉。曰伯夷。叔齊。於漢得一人焉。曰龔勝。并有宋謝先生疊山而四焉。夷齊世遠莫考。獨傳叩馬之諫與采薇之歌。龔勝漢藝文志亦無傳。然則孤忠大節。足以廉頑立懦者。並不必以文著也。而況先生忠義之發越。文章之超卓。又可法而可傳哉。先生登寶祐間進士。對策卽極攻董槐。校文江東。發策又歷詆似道。當是委質之初。架閣之微。非有兵革艱大之委。臺諫糾刺之權。天下事宜若可以謝其責者。而先生獨以天下爲己憂。憤權奸誤國。痛詆時政。至遭鐫秩貶謫。而

不辭。豈非正直之操。出於天性者乎。及宋社既墟。乃扶老母。變姓名。逋播閩嶠。賣卜建陽。恍然梅福之於炎劉。淵明之於司馬也。觀其上程御史書曰。宋室孤臣。只欠一死。所以不死者。以九十三歲之母在堂耳。吁。其志亦可悲矣。至太夫人考終。先生久已得死所。彼魏參政者。尙以爲摩霄之鶴。可繫以樊籠耶。先生精於易數。以天時人事。決宋之亡。於二十年之前。而驗於二十年之後。而先生之死。決於信州不守之時。而成於執拘投北之日。孔子之稱夷齊也。曰。求仁而得仁。如先生又曷愧哉。先生與文山爲同年進士。文山魁多士。先生亦爲二甲第一名。卒之後。先殉節。於科名爲有光矣。先生文集若干卷。皆高邁奇絕。忠義之氣。溢於言表。予訪得善本。命諸生校而刻之。後之覽者。尙其興起於斯文。

羅整庵困知記序

有明成弘以後。言學者日多。而見道反不明。何也。當時盛名所屬者。聰明材辨。皆足以自雄一世。彼其抱負。豈不以爲孔孟之道。得我而傳。程朱猶可擬議。然其弊也。屏絕思慮。以爲力制其外。而實無得於中。簸弄神奇。以爲已得於中。而實隔絕於外。此任道諸公所以懼而廓清之不遺餘力也。時則有羅整庵先生。痛排釋老。力扶正學。齒髮甫壯時。亦嘗馳縱於釋氏。探討其旨歸。苟非識見超拔。出汨沒而師聖賢。鮮不爲彼之所誘而去者。先生乃一返諸程朱。鑽研體究。隨所尋繹。輒書於篇。是困知記之所爲作也。其於邪正之幾。是非之介。析之精於毫髮。晚歲用功愈堅。自知愈審。推先生之心。邪正不並存。是非不兩立。有盡心知性之辨。而後明心見性之說。不得亂於儒宗。有格物致知之功。而後凌虛駕空之弊。不至貽誤後學。

迄於今。誦讀遺編。猶見巖巖之概。後之屏絕思慮。簸弄神奇者。事不知所自返耶。前代碩儒。巍然在西江者。餘干則胡敬齋。泰和則先生。萬歷時。敬齋固已從祀廟庭。先生之書。僅傳於世。而表章闕然。蓄極必通。其將有待乎。茲記原分六卷。略爲刪其重複。擇其精醇。得卷有四。竊不自揣。序以梓之。

魏莊渠集序

古人學問。只是理會此身。踐形惟肖。擔負許多道理。迨其後德業有成。而拄天踏地。障川迴瀾。千載之統緒歸之。卽當時後世之學者。莫不賴之。有明三百年間。真儒輩出。若崑山莊渠魏先生。其殆稱醇乎其醇者歟。先生幼穎敏。讀書數行俱下。然絕不有其聰明。蓋樸訥簡重。言動以禮。又其性成也。釋褐後。歷任郎署。不逾時。卽移疾家居。講明正學。先生真見得許多道理。與世之一切閒物。事都無交涉。而直以此身擔負之。意念固已深遠矣。未幾。詔起田間。兩膺學使。其在百粵也。毀淫祠。闢異端。興學校。育人材。規條井井。及在中州時。亦復如之。嗣進秩棘寺。遷轉司成。兼經筵講官。俄復改太常。守禮秉義。毫不與俗浮沈。然而所至多窒。慨然動賦歸之思。蓋先生以倡明斯道爲己任。不得行其志於天下。則當廣其教於吾徒。故一時學士大夫。質疑問難。慕道而來者。先生皆接引不倦。警覺而提撕之。且復力砥頹波。距邪崇正。於象山則辨其學未近道。於慈湖則責其逆天侮聖。拔本塞源。凡衛之之嚴。無非信之之篤。而語其得力。要在理會此身。毅然以聖賢爲必可爲。而且與天下共爲之。先生不云乎。人真有希聖希賢之志。則其日用所學。決須下希聖希賢工夫。若乃交無益之友。觀無益之書。談無益之言。作無益之事。不惟不暇爲。亦且不屑

爲至哉言乎。後之學者。慎其無益。以務求其有益。夫乃與學問之途。一身之內。善理會者也。抑先生又謂。經師易遇。人師難遭。今讀先生之文者。尙其奮然興起。亟思所以師先生也夫。

正誼堂續集卷之四

序二

易經提要序

大易者。聖人寡過之書也。彌綸天地。包蘊古今。其用著於卦爻。而其情蘊於河洛。自河洛之理不明。而卦爻之義遂晦。割裂穿鑿。以爲應世之資。欲求寡過。烏可得哉。余自通籍以來。宦遊四方。思得窮經之儒。與之參究義文。周孔真義。而竟寥寥。丁亥夏。奉命來撫八閩。廣求稽古力行之士。相與切磋。以裨風教。諸公多爲余言。漳有隱君子詹明章。峨士者。閩修獨行之士也。余不啻心慕。令郡守物色之。詹子年已八十。精神健旺。不遠千里。惠然肯來。觀其辭貌。懷懷德讓。居然有道君子也。叩其所學。出大易通義。洛範啓要諸書。詳考其說。蓋精湛於河洛之學者。又有易經提要一書。河東衛爾錫先生已爲序而傳之。所謂天地陰陽之文。無少差謬。先後正變之旨。觸處洞然。反之於經。既有定據。揆之於理。常無復加。旣已得其旨要矣。乃詹子未敢自信。而又質於余。余方思寡過未能。何足以言易哉。嘗聞沈元用問尹和靖。程子易傳何處切要。尹云。體用一源。顯微無間。是切要處。後來朱子舉似延平先生。延平曰。尹說固好。然須看得六十四卦。三百八十四爻。都有下落。方始說得此話。今詹子於河圖洛書。條晰極其分明。使人無纖芥之疑。於先

後天卦爻發揮又極精確而始爲提要一書以授學者則體用一源顯微無間詹子當必有以得之矣詹子遜世無悶而立言自不可廢雖未有知於今日必有知於後世余每嘉詹子之好學不倦老而益篤有相識恨晚之歎因序之以廣其傳

張錫祉春秋觀聚序

春秋一經也而緯以五傳諸家疏義不可勝紀顧朱子謂此經簡奧立說雖易而貫通爲難以故平日不敢措意其閒且有假年願學之思焉不其慎哉先聖曰吾志在春秋又曰載之空言不如見之行事之深切著明也其所以明王者之大法垂萬世之大經者至矣特以二百四十二年行事錯文見義在左氏則發傳之體三爲例之情五左氏以下抑復支分派別焉杜元凱言經之條貫必出於傳傳之義例總歸諸凡又令學者觀其聚豈非貫通之爲難歟蓋自左國公穀以及胡傳彼此聚訟互有異同於是後之訓詁箋釋者意見紛歧穿鑿傳會不一而止彼讀經無識得一說不能不移於他說而務彼說又難割愛於此說積千萬之散錢無索以貫之幾何不委擲於地莫可收拾也是故貫之者所以聚之而能觀其所聚則未有不貫之者夫經學在當理而作傳以通經聖人之宗旨殆有在也若聚訟紛爭廢興由於好惡徒執成見而無當於聖人之宗旨其可乎哉況膚淺末流背經反傳曾何足觀先儒之於春秋假年而切願學良有以也吳門張生錫祉窮經有得其於左氏之內外傳公穀胡氏之異同解疑釋滯較若列眉又或詳或略毋缺毋濫大異乎操戈入室以從事者標之曰春秋觀聚取諸杜氏觀其所聚意也然非貫而通之

何以能聚。子朱子所謂貫通爲難者。其將不難於張氏子乎。夫表章六籍。儒者責也。書輯成。請序於余。余喜其能明先王之道。大有裨於來茲。爰述其意如此。

濂洛關閩書序

堯舜禹湯文武周公之爲君爲相。孔曾思孟周程張朱之爲師爲儒。一也。一者何。曰。道也。堯之授舜。止於允執其中者。道惟一中也。舜之授禹。推之曰。惟危。惟微。惟精。惟一者。聖凡之相去。善惡之分途。直判其機以相示。亦道之不容有二也。自是道行於上。爲三代之盛治。道行於下。爲鄒魯之真傳。猗歟盛哉。然而孔孟沒。微言絕。自秦以迄漢唐。茫茫墜緒。綿延如綫。蓋亦盈虛消息之理固然歟。宋興而周子崛起南服。二程子倡道伊洛之間。張子篤志力行。關中學者與洛人並。迨至朱子講學閩中。集諸儒之成。而其傳益廣。於是世之言學者。未有不溯統於濂洛關閩。而以爲鄒魯之道在是。卽唐虞三代之道在是也。夫四氏出而聖道日新。六經四書。闡發無遺蘊。有志者不學則已。學則必由先儒之說。以求先聖之指歸。宜無不得當者。大非若秦漢時。榛蕪蔽塞。罔所適從矣。顧學者非不日誦先聖先儒之書。乃欲求一言一行之幾於道而不可得。抑獨何歟。程子之言曰。天下之學。非淺陋固滯。則必入於佛老之虛無。朱子又曰。聖人教人。非使人掇緝語言。造作文辭。爲科名爵祿之計。今之人。不蹈此弊者蓋鮮矣。夫刑名功利。訓詁詞章之習。固非學者所宜務。而執主靜良知之說者。希心頓悟。終不能不折而入於禪。先儒之垂戒尤彰彰也。先儒書具在。學者心驗而身體之。於周子可以會一理之通。而振俗學之卑陋。於張子可以窮萬物之故。而識

體性所自來。於程子朱子可以得主敬窮理。下學上達之功。而不爲誠淫邪遁所淆惑。故先聖之蘊。表章光大於先儒者。至爲明曉而詳盡。吾人生聖道日新之後。得開雙瞶之耳目。拓膠擾之心思。其幸也大矣。乃或拘於習染。養之無以全其性。充之不能盡其才。而又遺棄事物。脫略章句。陽儒陰釋。以亂其真。徒爲先聖先儒之罪人。豈不惜哉。雖然。道未嘗一日不在人心也。而其顯晦絕續之幾。所賴仔肩斯道者。卓然挺拔。不囿時趨。毋狹小以微近名。毋過高以希速化。堅自信而實用其功。周程張朱耳提面命。如在几席。夫然後得鄒魯之所以傳心者。上溯乎唐虞二代。蓋道無不一也已。我皇上崇儒重道。又命儒臣纂修各書。以垂教萬世。洵所謂治臻堯舜。學並孔孟者。至鄉會命題。尤重性理。使四氏之書直與孔曾思孟同不朽焉。茲叨撫九閩。承流宣化。實有未逮。惟是先儒遺書服膺已久。爰出平日所詮解者。令書院諸生互相參酌。仍付柳生椿。陳生紹濂彙訂。雖妄意編輯。自知無當。亦以俟知道君子略其僭踰之罪。進而教之也。因書以爲序。

小學集解序

古者有大學小學之制。而未有其書。太學書傳自孔門立三綱領八條目。約二帝三王教人之旨。以垂訓。程子以爲入德之門是也。然小學尙未有書。或有其書而亡之。學者不能無憾。於是朱子集聖經賢傳及三代以來之嘉言善行。作小學書。合內外二篇。三百八十五章。以立教明倫敬身稽古爲綱。以父子君臣夫婦長幼朋友心術威儀衣服飲食爲目。使夫入大學者必先由是而學焉。所謂做人底樣子是也。學者

不讀大學之書。無以得其規模之大。而不習之於小學。則無以收其放心。養其德性。而爲大學之基本。二書實相表裏。不可缺一。自世俗追求近功。弟子當垂髫時。卽習舉業。小學一書遂塵封高閣矣。我皇上崇尚正學。特賜頒行海內。而淺識者又第以爲課試作論之資。坊間刻本亡慮數十種。纂註標題。未免苟爲試論剽竊之地。而鮮有敷暢尋繹其文義之微。與其教人親切之意。引學者以躬行而力踐之者。如此。則何貴乎朱子之輯是書。更何以仰副詔旨。頒行期望始學之至意乎。夫朱子之爲是書也。規模節目。無所不備。蓋卽一篇之中。而每章每句皆有義理次第。每見註家於引四書之下。輒註之曰。已見論語。已見孟子。不知孔孟之言。編入小學。則爲小學之義理次第。雖意無殊歸。而語各有當。何疏略若此也。至若小學大旨。前賢論之頗詳。余括其要而言之。不離乎敬之一字。必也於內外二篇。三百八十五章。看得敬字義理次第分明。體之於身而實踐之。無不各有當然不易之則。修之則吉。悖之則凶。然後有以收其放心。養其德性。而大學之基本以立。苟不能敬。而存心處事待人接物。有與此書相背違者。則已失卻做人底樣子。而欲求入德之門。譬猶人之形體尙不能全。而欲肩重大之任。以經營四方也。有是理哉。余故集諸家註釋善本而融會之。以成是編。且爲之掇其大旨以弁之於首。俾學者知是書爲成就德業之要。勿徒視爲應試之資已也。

朱子學的序

自考亭朱子倡明絕學。由周張二程。上溯孔孟。迄明憲宗之世。二百餘年。當其時。金谿之說未熾也。而文

莊邱氏、依倣論語二十篇、采朱子之言、次爲學的、以爲吾道之體要、聖學之統宗、下學上達之旨、天德王道之全、靡不兼收條貫、會歸於斯集、蓋文莊之所纂輯、卽文莊之所得力者、故能深切著明、若此也、迨金谿之學盛、姚江、新會、並起爭衡、羣言淆亂、莫知所宗、學者罕能窺於道德之要、又豐蔀以制科之帖括、煥亂以剽竊之詞章、然後朱子之學、日以益晦、嗚呼、其不達於聖人之的、後之學者、宜其蔽歟、夫欲工於射、而閉其目、雖羿、蒙、不能發一矢、欲入其室、而憊其途、雖回、賜、不能有所就、今使學者省括於度、以從事於是編、精於思而不惑、純於氣而不亂、其知之明、極之窮神達化、而無所不通、其才之充、推之修齊治平、而無所不合、其道之行、至於化民成俗、綏來動和、而無所不得其當、則朱子之的、亦藉是以轟明、夫朱子之的、固周張二程之的、周張二程之的、固孔曾思孟之的也、朱子集周張二程之言、作近思錄、爲孔曾思孟之階梯、文莊作學的、爲周張二程之階梯、學者誠由此以求周張二程、從近思錄以求孔曾思孟、而造乎聖人之道、猶善射者視厥正鵠、而操弓挾矢、命中於百步之外、吾知其必有合也、是以不辭重鍔而爲之序。

伊洛淵源續錄序

昔朱子輯伊洛淵源錄、蒼萃程門師弟子授受之際、一言一行、莫不條列備載、其居恆磨礱薰陶、裁抑其過、激厲其不及、或隨其材、或因其時、教者之所以教、與夫學者之所以學、概見於斯矣、自後未百年、而又有天民先覺者出、接引後學、爲之指其門庭、表其梯級、而先後之、於是聖道益明、源流益遠、則是續錄之

所爲作也。夫二程子師濂溪而友張邵，倡道伊洛，一時高第弟子如游楊尹謝數十輩，率能卓然有立，尊聞行知，以不負付託之重。蓋自鄒魯風微，斯文勃興，越千餘年一盛，恐其難爲繼矣。然而引而彌長，擴之乃大，自楊而羅而李，三四傳至晦庵夫子，膺斯道之任，而集羣儒之成，繼往開來，流行浩瀚，無論通都大邑，僻壤窮村，靡不願遊其門，執經請益。當此之時，循循誨誘，無間晨昏，所謂居敬以立其本，窮理以致其知，反躬以踐其實，及夫言行之一致，體用之一源，務使切己尋求，由博歸約，而登斯堂，聞斯旨者，亦皆佩服勿諉，各得其意以去。猗歟盛哉！張南軒嘗曰：道在武彝，信矣。其猶原泉混混之出於深山，迤邐九曲，分爲萬派，播爲百川，合而渾涵渟渚於四海中乎？此其爲淵源詎有盡藏歟？續錄舊本自有明成化，謝方石先生已彙輯成帙，分爲六卷，然採取未備。至隆慶時，薛公方山復因莆陽宋公初稿而重編之，名曰考亭淵源錄。顧宋公初稿雖未及詳定付刻，而編輯頗嚴。如朱子同志之友，自廣漢金華而外，概不之錄。方山所刻，則於金谿永康永嘉悉爲增入，竊恐世之釋其緒綸者，或借吾儒之說以蓋其佛老之真，或喜浮夸之談以辨其功利之習，又將何以正之耶？余不揣固陋，參互考訂爲二十卷，折衷於方石，莆陽二者之間。命陳生紹濂編校授梓。後之學者，庶知大儒間出，其一時師友之所漸漬，及門之所依歸，開悟釋疑，精深廣大，講學極其盛，而衛道極其嚴，析之入秋毫，而放之彌宇宙，所以表章先聖者在此，所以津梁後學者在此。而凡師弟閒磨礱薰陶，激厲裁抑，合之程氏之門，初無異轍焉。或者有當於朱子輯伊洛之意，則是錄真不可以不續，而謝宋二公不又先獲我心哉！因書以爲序。

性理正宗序

人稟陰陽五行之氣以生。而太極之理具焉。命之於天。成之於性。性無不同。而氣稟則有清濁之異。智愚賢不肖之分。途於此。古之至人。所以能知性所從出。而復全其天者。必有靜存動察。下學人事之實功。以馴致乎自然。而非徒寂守此虛靈不昧之心。使之凝然不動。俟其一旦豁然省悟。謂可惟吾意之所欲爲。而不顧也。是則心也。者性之所寓。而非卽性。書曰。人心惟危。道心惟微。殆謂是歟。自孟夫子倡明性善之旨。以惻隱羞惡辭讓是非。四者爲仁義禮智之端。學者務在擴充以盡其力。於是乎告子之徒。雖誤認知覺運動爲性。所謂不得於言。勿求於心者。終不能逞其狂瞽之說。以惑亂天下。孟子之功偉矣。厥後荀楊輩。或云性惡。或云善惡混。邪僻之見。均足以害道。降及漢唐。千有餘年。詞章功利。惑溺沈痼。未有灼見心性之源者。得程張諸子起而闡明之。程子之訓其門人。以謂窮理則盡性。盡性則知命。是知非窮理無以致其功。而張子則云。合氣與虛。有性之名。合性與知覺。有心之名。學者必須敬其事。敬固聖學之所以成始成終也。嗚呼。可謂深切著明矣。曷嘗有默坐澹心。可以證道之說哉。不一再傳。而金谿之學熾。甚以爲卽心是理。六經皆我註脚。不立文字。可以識心見性。不假修爲。可以造道入德。守空洞無涯之識。而昧然於天理之眞。學者樂其簡便而易從也。於是矯誣聖賢。捐棄墳典。逞其擎拳豎拂之餘智。猖狂叫嘷。猶自擬於聖人之尊德性。若非紫陽朱子反覆辨難。大聲疾呼。比之爲告子。又直斥之曰禪。其爲正路之荆棘。入門之障蔽。寧有紀極耶。幸而格致誠正。修己治人之道。大明於天下。雖百世守之可也。何又有姚江王

氏祖述金谿。而以朱子之學爲支離影響。倡立致良知之新說。盡變其成規。知其不足以服天下。則又爲晚年定論之書。附會牽合。以墨亂儒。天下之談心學者。靡然響應。皆放佚準繩。不知名教中有何事。至啓禎末年。而世道風俗頹敗極矣。蓋比諸金谿之爲禍。殆有甚焉。嘗見傳習錄。有云。無善無惡者心之體。於事事物物上求至善。卽爲義外。嗚呼。此卽六經註脚之唾餘也。卽勿求於心之宗旨也。不知窮理持敬。是以不識心性。惟不識心性。故於默坐。邀心時。偶見西來面目。卽驚爲獨得之祕。遂至挾此以凌駕古今。莫之能禦。昔人有云。以學術亂天下。於姚江見之矣。非有特立不回之君子。障其狂瀾。而撲其熾燄。吾道其尙何望乎。余幼讀性理大全一書。見其引據詳贍。亦旣留心潛玩矣。惟是天文地志。律歷兵機。讖緯術數之學。援引甚繁。未免失之駁雜。又其爲書。於儒釋參同語。及縱橫家議論。概有取焉。似乎擇之不精。余不揣固陋。謬爲編輯。刪其繁蕪。補其缺略。尊道統以清其源。述師傳以別其派。凡靜存動察。下學人事之實功。有切於心性者。無不盡其節目次第之詳。於宋則取周程張朱五子之言爲的。於元明則以許薛胡羅四君子繼之。其餘諸子。間有採錄。不敢濫爲摭拾。惟於異學之邪僻。足以惑世誣民。而後之人能抉其樊籬。披其根株者。衛道之功。不可泯爲之三致意焉。是編也。始於辛丑。迄於癸卯。閱三載而後成。名之曰性理正宗。非敢自附於知道。惟自盡其區區向學之志。以遠於荆榛障蔽之歧途。尤願後之學者。循塗守轍。崇實黜虛。不至誤認知覺運動爲性。而默守其虛靈不昧之心。則窮理持敬。下學可以上達。盡性卽以至命。於以上接濂洛關閩之傳。無難焉。此固學術之幸也。亦世道風俗之大幸也夫。

居濟一得序

古人之治河也。治其汎濫橫溢。足爲吾民害者。引之於沮洳窪下之處。徐徐焉趨入於海。而治河之事已畢。蓋其時閒曠之地甚多。委而棄之。不與水爭。故得施其疏濬之功。絕無所顧惜。而水亦順性以往。無奔騰衝決之患。今也不然。梁豫青兗淮徐之境。郡縣村落。星列棋布。生齒日繁。桑麻遍野。凡昔人所棄以與水者。盡爲沃壤。民所必爭。水既無所容蓄。而又爲轉漕必由之要路。不得已而大爲之隄防。跬步之間。紆迴屈曲。使俯就吾之約束。幸而數千里間。不至有尺寸之滲漏矣。又恐其不足以轉漕而濟運。是必民不病水。水爲漕用。而後可以言治。夫以今人之才力。遠不逮古人。乃其遭際之艱難。似有倍於古人者。奈之何。不智勇坐困。用力多而成功少也哉。雖然。滄桑變易。自古有之。彼蒼愛民之心。決不忍使數十郡縣無辜之赤子。頻遭昏墊。則所恃以利賴而安全之者。要在人事之補偏救敝。相時度勢。毋拘成格。毋循覆轍。善爲之節宜而已矣。豈宜委諸氣數之適然。漫曰古今人不相及耶。余自庚辰歲奉命效力河工。日夕奔馳於淮揚徐泗數百里之間。考古人之制度。驗今日之情形。源流分合。高下險夷。亦既悉其大概矣。閱四載而膺山東治河之命。甫視事。適遇雨潦。隄塍在在漫溢。民田處處淹沒。夙夜殷憂。求所以無負厥職者。越歲又值亢旱。運河水涸。致廩宸衷。命廣善庫郎中德成格。馳赴封開催漕。並傳諭宜設法蓄水。量塘放船。余與德公恪遵訓旨。體究詳盡。漕運果得無阻。早達神京。此皆聖謨遠照。足爲千古之良法者。余不揣固陋。溯流窮源。力求有益於民生國計。數年以來。越阡度陌。相度經營。兼詢之故老。考之傳記。凡蓄瀉啓

閉之方宜治宜革。或抑或因。偶有所得。輒筆之於書。以備他日參考。積久成帙。分爲若干卷。敢曰。這是說也。將以補偏救敝。獨任其難。而不愧於古人節宜之義乎。亦聊以自盡其一得之愚云爾。善乎。印川潘公。有言曰。時勢可行則行之。不可行則緩之。慎毋使我誤後人。後人更誤後人。此卽余之素志也。抑有說焉。事不久任。權不歸一。則功敗於垂成。如同築舍。前明宋尙書之已事可鑑已。夫以數十郡縣生靈之命。而皆仰藉一人之謀畫。事寧有重大於此者。惟在慎擇其人。假以便宜之柄。使得久於其位。而不爲浮言衆議所搖奪。凡利多而害少者。毅然獨斷行之。無稍顧忌。建非常之原。以貽千百世生民之福。功孰偉焉。若徒汲汲於補苴罅漏。防護壅塞。歲糜國家無窮之帑。微俸於旦夕之無事。謂可藉手告無罪於古人。適足貽笑後人而已矣。是烏足與言治河之術哉。

漳浦蔡氏家矩序

嘗讀大易家人象曰。父父子子。兄兄弟弟。夫夫婦婦。而家道正。未嘗不穆然深思。以爲齊家之道。篤恩義者。必以正倫理爲本。而秩然之分。恆與藹然之情相維繫。昔人所謂閨門之內。肅若朝廷。有取諸此也。夫治國。平天下。實始齊家。故大學釋齊治曰。孝曰弟。曰慈。釋治平曰。老老曰長長。曰恤孤。卒無出家而成教者。惟是一家之中。分位匪一。欲使親疏厚薄咸得其宜。上下四旁均齊方正。苟非得一矩焉。爲之審度衡量其間。則長短廣狹安保無有餘不足之處。此子朱子或問所以深紬繹於斯也。余撫閩時。得士誠多。若漳浦蔡宮聞者。家學淵源所由來者舊矣。居恆讀書窮理。殫心著述。遇事躬行實踐。勇於有爲。雖在諸生。

而其經術閎深。直可補政教所未逮。且復親師取友。虛懷善下。嘗欲然不自安者。其從余游也。閩閩及吳。凡數載。所持以質正者不一而足。而於齊家之道尤深。有會心焉。蓋當宋紹熙間。朱子官臨漳。興學校。明務化。採古喪葬嫁娶之儀。揭以相示。蔡氏先世恪守其教。至於今不墜。故宮聞得紹述先業。坐言起行。間爲援引諸儒。參以己見。互相發明。無不脗合。編成一書。爲類二十。有取於大學絜矩之義。名曰蔡氏家矩。夫矩所以爲方。宮聞誠能度長絜短。於是乎神而明之。吾見其斟酌損益。務求情理之當。而得人心之安。上而祖父高曾。下而家人婦子。以至於居鄉居官。舉凡宏綱細目。準之而宜。推之而國而天下。無不肆應。而允協。是直朱子之功臣。又豈僅爲蔡氏一家之矩已哉。余因之有慨矣。世學弗講。禮制日湮。士大夫苟圖溫飽。一切宜家睦族。饗親保子孫之道。蔑若罔聞。因而踰闕蕩檢。剗方破圓。而里巷無識之夫。溺於時趨。轉相倣效。恬然不以爲怪。然則風會之升降。汗隆。非儒生之責。而誰責與。勸哉宮聞。尙以其身爲一家觀法。卽以其教家者而移其治於官。吾知上下四旁均齊方正。無不有各得之分。願也。矩之時義大矣。勸哉宮聞。

盡心錄序

天地之道。有春溫必有秋肅。帝王之治。以德化不廢刑威。故刑之象屬秋。所以懾服斯民。桀驚不馴之氣。而使之懷懍。然不敢以或犯。則肅殺之中。有生長之意寓焉。初非以慘刻之具毒天下也。三代以前。尙德緩刑。有一不善。從而矜恤之。又從而提撕警覺之。卽至情真罪當。猶必別其故誤。嚴其出入。三宥而後制。

刑其載諸經傳者班班可考。漢唐以後。文網稍密。民生日促。幸有一二慎刑之主。爲之戒深文。釋重辟。幾幾乎有刑措之風。故能享國悠遠。保世滋大也。後之任刑官者。絕不解此。徒知威福。惟我恣行。臆見擊斷成獄。將欽恤之謂何。甚而請託公行。苞苴不絕。視民命如草芥。任桁楊以徇私。迨案成覆勘。則稱冤纍纍。嗚呼。是不特殺人以媚人。而且殺人以肥己矣。尙忍言哉。尙忍言哉。余久欲取古今慎刑諸書。裒集成編。以爲當官者勸。無如案牘紛繁。有願未遂。適金沙李先生持盡心錄一書。欲重梓以行世。而問序於余。不禁喟然歎曰。有是哉。先生之先得我心也。夫刑所以輔德也。德化之所不及。於是乎有強梁頑梗之徒。甘自蹈於法網。庭鞠之下。其情有掩蔽不吐而難以遽信者。非明敏不克以決其疑。有畏刑誣服而不能昭雪者。非精思未足以洗其冤。若夫情僞微曖。變幻百出。歷訊滋累。而連年不結者。更非中正公廉。苦心推勘。無以燭其奸而得其情也。卽有重大案件。信讞已成。尤須詳加體察。求其生而不得。然後引律例以斷之。方不失仁人君子之克盡迺心者。苟其矜智銜能。逞威散法。爲一己邀功避罪計。是罔民也。何以爲民。父母書曰。惟明克允。又曰。與其殺不辜。寧失不經。可不加之意乎。今聖天子在上。好生之德。洽於民心。或有身負重辟。猶從寬典。浩蕩之恩。洋溢中外。余承乏江蘇。當斷決之際。恆恐有一不慎。傷及無辜。用是日夜祗懼。求所以惠此生民者而不得。茲閱是錄。益信明察不足矜。私智不足尙。揆乎情。斷乎理。以詳慎之心出之。爲平允之政。斯已矣。竊願當官者。日手是編而讀之。以不忍人之心。行不忍人之政。庶幾刑無不當。法不妄加。於以體聖天子欽恤民命。刑期無刑之至意。雖唐虞三代。曷以加茲。又何春溫之不卽寓於

秋肅中哉。是爲之序。

王學質疑序

自陽明王氏倡爲異學。以僞亂真。援儒入墨。天下學者翕然宗之。於是荒經蔑古。縱欲敗檢。幾至不可收拾。此蓋有氣數存乎其間。非人力所能爲也。然當狂瀾橫溢時。猶賴有覺世憂道之君子。如羅整庵、陳清瀾兩先生。先後繼起。震聾發聵。得以稍稍廓清。顧猶有爲調停兩可之說者。叩之則曰。學者尊所聞。行所知。遵朱而不關王可也。何用嗶嗶焉逞筆鋒舌劍。效辨士之所爲。嗚呼。是何言也。夫欲入德者之必先屏絕淫聲美色也。夫人而知之也。旣屏絕矣。又必日親正人賢士。受其箴規藥石。磨礱攻錯。日久而後底於成。亦夫人而知之也。今日尊朱而不關王。是何異欲親正人賢士而復任淫聲美色之日濡染於耳目之前。謂可以不拒者拒之也。有是理乎。嘗考朱子之學居敬以立其本。窮理以致其知。反躬以踐其實。循循畏謹。奉前聖之格言。佩前賢之遺矩。終身悚惕於視聽言動。倫物政事之間。若無一息可以便安者。其爲學固似乎拘苦。然上之可以入聖。次亦不失爲賢人。乃陽明獨敢詆之爲支離影響。別立致良知之說。以爲卽心是理。但求此心之速悟。六經任我驅使。不必循塗守轍。而自合於道。學者旣喜其便捷。而又可以任吾意之所欲爲。於是苟且俱薄之士。憑凌睥睨。得以恣行其胷臆。詆呵聖賢而不顧。滅裂綱維而不畏。沿至百有餘年。而士風不可復問矣。豈當時士大夫盡以朱子之學爲非。而必欲變亂其成法哉。其始不過存一調停兩可之見。不能勇於決擇。久知其不便於己。卒至決然舍去。縱恣自適。其勢不中立。而又轉

移之速如此。甚可懼也。吾烏知夫今之學者。不又承其流而襲其弊也耶。武承張先生。品行卓然。不隨流俗。初出入於王學者有年。旣而翻然自悔。洞徹底裏。著爲質疑一書。以問世。蓋真能勇於決擇者。余一再披閱。不禁喟然歎曰。何其憂道之深。覺世之切也。其大要以朱子之學。紹述程張而遠宗孔孟。王氏之學。紹述象山而遠宗告子。就兩家之言。直指其牴牾舛錯之處。其若何附會牽合而卒相矛盾。率天下爲佛老。日趨於淪胥而不救者。能一一窮其源而披其根。蓋其心卽羅陳兩先生衛道之心。而抉摘精微。則又有前人所不及道者。學者果能信其言而熟復玩味。不啻暗室一炬。中天白日。任足所之而不迷於歧途曲徑。夫豈譸張詭辨。畔道離經之說所能惑溺其心志也哉。是書爲當湖陸稼書先生所極賞。久經鈔訂刊行。惜乎學者不得多見。余故重付諸梓。以廣其傳。成先生嘉惠後學之志。并以明余之非敢好辨云。遂書以爲序。

松陽講義序

學者講於聖賢之道而不切於身心。雖連篇累牘。自識者觀之。徒以佐其徇外爲人之私而已。四子之書。聖賢精蘊之所聚也。其切於人之身心。如布帛菽粟之不可離。一日不得則飢寒立至。是豈可以不講。而講之豈可以不切於身心。而僅資爲干祿之具已乎。陸稼書先生。當代真儒也。其生平用功。惟在四書。晝考夕思。如食之充飢。衣之禦寒。所著諸書。擇焉必極其精。語焉必極其詳。海內學者。尊如蓍蔡矣。其松陽講義一百一十八章。則其宰靈壽時與諸生講解而彙以成編者也。余嘗患聖學之不明。一在於異學之

空虛。一在於俗學之卑陋。自明季陽儒陰釋之學熾。將孔孟遺言改頭換面。混入西來宗旨。是所謂操戈以入室也。厥後諸公辭而闕之。稍覺廓如。而從事科舉之學者。亦隨聲附和。辨詰紛然。究之。不過尋章摘句。便於取世資。按之身心。毫無關切。是又何異於買櫝而還珠乎。先生力挽斯弊。故其與學者講解四書。諄諄懇懇。引而歸於身心。辨別異端。振興俗學。使人知其途之所從往。而力行以求其至。一篇之中。三致意焉。先生之用心。可謂勤矣。抑余考先生行己師法程朱。凡事一本至誠。自修身正家。以至莅官立朝。動有矩度。一介不取。以貞其操。直道而事。以遂其志。懷然樹乞。墮斷之防。泊然守陋巷簞瓢之素。其所守者正。其所見者真。皆出於躬行心得之素。而不爲空言。用能興起人心。扶持正學。視世之連篇累牘。而反以晦聖賢之道者。其相去何如也。則此一百一十八章。雖未足以概四書之全。學者讀而玩之。亦足以鍼膏肓而起痿痹。其於身心之益。豈淺鮮哉。予故序之如此。

冉永光八十壽序

歲丙申之四月。蟬庵冉先生壽介八旬。其姻婭戚友。及諸門弟子。謀所以壽先生者。靡不豔稱盛事。言人殊。或曰。文章華國。足爲世珍。先生宜壽。或曰。寄迹東山。嘯傲自適。先生宜壽。或又曰。子孫繩繩。克紹前徽。先生顧而樂之。益宜壽。要此譽望之顯崇。襟懷之高寄。後嗣之迭興。固皆壽徵所必及。而獨不可以語先生。蓋先生之壽。不於其年而於其學也。憶余年未壯。卽耳先生名甚熟。知設教於嵩陽書院。慨然以斯道爲己任。心竊慕之。顧猶未得覲面承教也。已而先生翔步天衢。鳴飛翰苑。學日益有名。而德加進。四方

聞風景仰者。咸以不得一近丰采爲憾。時余適備位中垣。因得晨夕過從。考道論心。磋磨砥礪。嘗喟然歎曰。先生之學。稔朱之學也。余雖未敢竊附諸賢。顧時時與聞正道。因之日夜刻責。迄今歷仕多年。恪遵聖賢遺訓。朝廷成法。不敢妄爲一事者。皆先生教誨之力也。未幾。先生給假旋里。余以讀禮家居。於戊寅之歲。構請見書院成。遂延先生主持講席。聞儒先之精蘊。闢異路之荊榛。搜羅愈博。研晰愈微。其尊崇正學。啓迪後人。曾不異曩日在嵩陽書院時。蓋先生澤物之功。於是爲大矣。獨恨余一別之後。碌碌風塵。不轉瞬間。幾二十載。學殖日就荒落。志雖盛而氣則衰。回意聚首時期許之深。未嘗不爲之廢書三歎。而先生獨優游鄉井。鍵戶著書。問業請益者以數百計。今且皤然爲八十翁矣。步履如故。矍鑠猶昔。是則先生之所以壽。乃天之嘉惠後學。俾得繼續斯道之傳。而於先生乎有厚望焉。豈僅如世俗云云哉。不寧惟是。彼世之銳意功業。赫然見譽於庸衆人者。何可勝數。而道術無聞。德音不著。雖享遐齡。備厚祿。不旋踵而消歸烏有。而先生乃以不世出之英。發明千百年來聖聖相傳之道。警醒聵聵。寤彼來學。正猶日月之常明。星辰之常麗。嵩嶽河海之亙古而不易。是先生之壽。歷之弈禩而正未有艾也。區區之年。又曷足論乎。余與先生交最深。故信之最篤。敢述生平相與之素。以爲先生壽者如此。若夫揄揚褒美之詞。則固世俗之人盡能道之。無俟余言之贅矣。

費晉陶六十壽序

歲丙申之七月。費子思任自吳門寓書於余。述其尊人晉陶君今年六十初度。求余一言以爲壽。余維思

任欲以詩文闡揚其親。凡通門夙好。暨姻婭戚族。諒無不爭致華美之詞者。奚俟余之言。且余夙聞君德望隆偉。里黨奉爲宗師。詒厥孫謀。後昆迭起。凡可以致壽之道。無弗備。又何煩余之言。以爲稱祝。雖然。有說焉。夫人世之修短不可知。而休聲令聞。獨垂不朽者。亦視人子之顯揚其親者何若耳。世不乏赫赫著功業。炳耀耳目間。人之稱其親者。止曰有子若人。克致通顯而已。又或役志詞章。雕鏤精刻。撫英拾華。文日益有名。人之稱其親者。止曰有子若人。才堪著述而已。余度君之所期於思任者。不僅是也。思任負果敏之才。憫俗學之淪胥。異學之沈痼。慨然以大道爲己任。常言周程張朱而外無正學。許薛胡羅以後多歧途。卓哉是言。何見道之真也。今其所詣。縱未敢遽謂比隆數君子。顧其立意較然不溺儕俗。將由是日進不已焉。非數君子之書不敢讀。非數君子之行不敢行。晝而講貫。夕而習復。整思密慮。毋怠毋荒。時若數君子者。提撕警覺於前。是一出言而不敢忘父母矣。步儒先之堂奧。樹來學之津梁。有子若此人。且以尊崇數君子之親者。畢舉而屬之於君。是則君之壽行且超絕古今。卓越倫類。與日星河嶽共爭千古。思任思所以壽其親。道無大於此。豈必效世之人縈情功業。畢力文詞。冀少得令名。以爲吾親光寵乎哉。且今者思任擯棄儕俗。不自菲薄。亦卽得之庭訓者多也。克承親志。揚厥休聲。於易之義爲克家。於詩之義爲不匱。書稱堂構。禮重箕裘。皆是物也。吾固知思任之必能體此意。以榮其親。吾又信君之必樂聞是言。而以余所厚期者轉而期之思任也。遂不揣固陋。而爲君祝者如此。若夫侈陳美盛。曲意揄揚。則固盡人能道之。不待余言之覲縷矣。

